

平
播
全
書

平播全書卷三

明長垣李化龍著

奏議

初報捷音疏

題爲防兵鵬勦屢挫賊鋒恭報捷音以慰聖懷事萬曆二十八年正月十八日據川東監軍道參政張棟原任鎮守四川總兵官劉綎防守南川分守松潘副總兵周國柱原任遊擊王之翰呈據酉陽宣撫冉御龍申奉臣憲牌臣憲牌節據塘報差人探得播賊於十一月初五日發兵二萬割在地名官壩與南川綦江相連將連界人民房屋燒燬

其東鄉兩山人戶見勢重大負夜般逃一空又稱播賊自領萬兵欲出婺川眞州必來攻南川等情看得逆賊親統大兵爲謀甚狡牌仰冉御龍督率部下目把土兵人等於南川郭外登高拒險枕戈以待如遇賊來相機撲滅前後夾攻固不可容賊衝入亦不宜爲賊深誘奉此隨該冉御龍一面分布土兵把守隘路外又於正月十三日蒙總督院部監軍道并南川路監紀官高推官明文照得播酋逆天大兵進剿師期在邇乃酋黨郭俊何廷順等督不畏死糾聚苗眾尙據寨子山等處肆行劫掠法應相機翦除以開平定之勳實惟今日時不可失牌仰該司卽照牌內事

理施行蒙此該卑職親統部下苗蠻夷兵并把總冉大周等於本日申時直至地名乾壩乾溪口偵探情形撞遇苗賊三百餘人前來哨路我兵截殺一陣賊遂奔敗乘勝追趕賊據官壩險固時已十四日辰時賊知我兵逼近堅壘拒敵梭杆礮石如雨勢難仰戰遂將兵分十股四面夾攻又用奇兵一枝自後衝殺各賊首尾不顧我兵前後奮勇斬關直上賊眾潰散跌崖死者無算當陣斬獲首級三百零三顆生擒十餘名內卑職當陣親斬大功一顆審據生擒犵苗阿保險係應龍叔舍稱呼楊老祖部下衝鋒目把許朝用等擒斬功級內八顆驗係天家管苗楊把事犵莩

辛把事木佬苗長李把事雷把事藍把事又楊把事苗頭
阿番李保屬官楊正生部斬四顆報效生員冉維嵩親斬
一顆部斬三顆冉必和親斬一顆部斬二顆俱願紀本司
儒學作養保靖土司應襲彭象乾親斬一顆部斬一顆內
一顆係張提調男又生擒犵狁苗一名阿保男婦僧人十
名口奪獲皮盛甲五十件長刀八十把弩五十張箭五筒
牛馬二百五十二隻陣傷兵三十名陣亡二名又把總冉
大周富陣親斬把關賊首一顆審據俘獲民婦王氏僧海
壽認係何老祖首級就身掇出何廷順爪探天兵消息稟
帖三紙爲實親男冉良彝斬級一顆審據生擒黑佬認係

賊黨郭老祖卽郭輝首級就身接出本賊爲明月山統制
印牌二紙爲實井生擒狔狔一名蔡亞三次男冉良範斬
級一顆部斬六顆以上俱願紀族兵冉大宗等共斬級四
十顆俘同婦女三口奪獲盔甲十一件槍五根刀四把馬
二匹被傷兵十二名等因到職隨公同運餉劉通判周副
總王遊擊於教場驗明內有幼功二顆削除外實止首級
三百零一顆生擒男婦九名口僧人一名全活被虜婦女
三口奪獲馬三十四匹水黃牛二百二十頭皮甲三十二
領皮盔二十九頂刀八十四把弩五十張箭五筒槍五根
被傷兵四十二名陣亡二名俱查驗明實除擒獲男婦與

全活婦女并首級等項聽該司徑自解驗合行呈報等因具報到臣批行監軍道會同兵巡上川東道驗明照格行賞外案照先於正月初四日據參政張棟報准總兵官劉綎報據副總兵周國柱遊擊王之翰報據石砭宣撫司宣撫馬千乘申稱先奉臣憲牌照得播賊猖亂警報不常本部院隄備之約申飭之令已不啻再三再四矣今歲杪在邇元旦屆臨誠恐將士燕樂酣飲賊反伺隙入寇昏夜之間人不及甲馬不及鞍安能與之相角其不取敗者幾希牌仰道鎮轉行到職務要比常加嚴隄備賊如不動則斂兵固守設若入犯則併力合攻候本部院約期大舉奉此

遵依卽差總管秦邦屏馬廷培馬邦田譚朝國等統領土
兵一千五百名前去分任信地鄧坎劄營把截以防入犯
間忽於正月初二日夜三更時分播賊發兵不知其數前
來衝劫比因昏夜遵守號令堅壁固守不敢出關挨至天
明酋兵益肆狂逞逼近挑戰我兵只得奮勇一擊衝殺上
寨攻破金竹伏土葛泥青岡背榜山虎跳關等處斬苗頭
梁俊等二十七級生擒苗頭梁本先梁廷耀婁起國陳嘉
付張日旺等五名乘妻秦氏報效頭目馬忠領兵秦邦學
等斬獲苗級三顆生擒壯苗三名梁廷邦陳加榮方起用
俘獲男婦二十三名口奪獲苗刀槍弩三十五件邊勇范

文輝斬獲壯功一顆餘賊奔逃輕重傷土兵童春任興德
何接陽張文達邊勇陳嘉爵蔣正武六名等因具報到臣
批行監軍道會同兵巡上川東道驗明照格行賞外又於
正月初六日據貴州布政司并監軍道參議張存意駐鎮
黃平通判王三策各呈奉臣憲牌照得播賊糾合九股生
苗攻破東坡爛橋王解殺虜屯軍結聚不散似此情勢
必狂逞仰道會同總兵童元鎮或設法解散或用計勦
務要驅逐歸巢驛路通達又奉貴州撫院紙牌照得逆苗
雖已蹙退而東坡兩山阻塞官路上下不通此必山中尙
有屯聚者豈容坐視合行撥山擒勦行道備行參將劉效

節添調防守黃平安順州把總張鶴琳鎮谿所土官指揮
向世爵千百戶吳國輔孫之襲等帶領漢土官兵會期約
於初十日齊至興隆東坡一帶官道將兩山屯劄苗賊夾
攻擒勦賊級一十八顆生擒惡苗九名俘獲男婦三十七
名口鞭馬二副鐵甲一籠并器仗各賊奔進大江等處當
差鄉導都保前去翁谷龍羅由成溪三寨傳宣殺伐彼各
寨苗頭金虎召倉傅亂等前來歸順諭令守東坡一帶道
路姑饒不殺各苗承認擔保將牛一十二隻以求退兵各
職不敢深求收兵回衛防禦各等因轉報到臣除將有功
員役應賞者分別獎賞應敘者聽候併敘被傷軍兵量行

優恤外該臣看得賊自破綦江以來彼方志得意滿肆張
虛聲以恫喝外方而我亦轉餉集兵不動聲色以專候大
舉蓋兩相持而莫爲先發者久之乃至冬月行盡賊見臣
移鎮入渝自知罪在不赦剿在必行狡焉有鴟張豕突之
態以川中有備未敢長驅乃貴池尙虛輒恣狺逞東坡爛
橋已罹狂鋒龍婆思石日傳警報臣乃一面移文貴省撫
鎮勦苗以清興黃之道集兵以厚龍婆之防一面催調施
州衛平茶司各土兵及建越兵共萬有三千自川入貴助
爲防守一面行沿邊防守土漢官兵相機騰剿以牽賊之
勢而釋貴之圍乃無何而報捷者紛紜至矣貴州之斬獲

雖不甚多然自是而生苗不復入播官道得以無阻我得專意行勦非小補也而川中南川之役初而斬級者三十破其金竹等七寨繼而斬獲者三百遂破其官壩大營雖兵力未齊未敢深入以成破竹之勢乃積弱之後初有此捷人始知賊無足畏各有戰心賊亦知外兵漸強或可少戢其猖狂之勢矣是役也撫鎮司道籌畫多方漢土官兵感激用命至南川二捷皆推官高折枝監督鼓舞所由致然其功均有不可泯者但臣今方傳檄三方會期夾勦犬事未就曷敢先敘微功直以逆賊半歲以來如火然水決居然有燎原滔天之勢一旦駢首就戮如彼其多亦足以

少寬皇上西顧之懷而暫快海內念亂之志故不敢不以
上聞伏乞敕下兵部俟事完之日統行議覆施行緣係防
兵鵬勦屢挫賊鋒恭報捷音以慰聖懷事理未敢擅便爲
此具本專差承差楊照齋捧謹題請旨奉聖旨兵部知道

留總兵劉綎勦播疏

題爲天討方張師期在邇乞留調用大將分路進剿以便責成以收全勝事據原任四川鎮守總兵今改提督南京大教場右軍都督府署都督僉書劉綎呈稱云云等因隨該臣看得本官係全蜀大將正當用兵之際新將未到例應候代况本官雖以履任遷延有議然自受事以來綜理一切戰守機宜頗盡心力卽今大舉在邇相應留用一面行令本官照舊任事一面牌行監軍兵巡等道查議去後隨據川東監軍道參政張棟兵巡上川東道參政張文燿呈稱照得原任四川總兵劉綎提戈奮武家傳黃石之經

櫛雨沐風數厯青油之幕百戰東西南北滿腔勇膽機謀
猿臂請纓壯氣堪當一面虎頭食肉先聲夙震三巴頃潢
池廬西顧之憂乃幕府報南移之命竊思臨敵易大將恐
爲兒戲棘門而便道擊樓蘭更樹威名荒徼合無將本官
以原官管地方軍務仍令協同總兵官吳廣先國後私同
心共濟誓必翦此而後朝食相期釋甲以事春農呈乞具
題等因到臣卷查近准兵部咨該臣題爲郡城偶值兵變
旋已平定查叅文武臣工以明法紀以圖安攘事又該巡
按四川監察御史趙標題爲夷患方殷兵變忽作查叅貪
險軍帥并議文武臣工等事又該刑科右給事中陳維春

題爲西蜀禍亂相仍人心怠弛可慮等事俱經本部覆議
合候命下將劉綎改補南京右府僉書遺下員缺本部照
例會官推補等因奉聖旨劉綎著改南京右軍都督府僉
書員缺便令推來用欽此除欽遵外今據前因該臣看得
將兵者期於戡定禍亂不嫌疵類將將者要在鼓舞豪傑
無妨顛倒綎將家子也其父顯稱時名將功名著於蜀中
綎結髮從戎屢經戰陣征播之役特奉專遣上以報國下
以承家綎所宜竭蹶而趨宜何如其急者而遷延道路數
月方來責以逗遛卽置之於理亦不爲過乃陛下猶念其
東征之勞榮以南遷之命議者謂處之尙輕是矣顧綎武

人也連年東征西討動必及之若謂天下有變一日不可少此人者遂矜而自功淹速自便於人情亦有之卽在事諸臣亦以爲似已不可使者維時臣亦薄之直以吳廣未至例須留之候代乃自其候代以後而人又多言其可用也以爲可用者有二其一謂綆父子久在蜀中卽蜀人與播中人頗憚其威名今當平播亦不可少其一謂綆未改南以前其氣頗盈將驕卒惰兵家所忌必不可用自改南以後懼失事機又懼蹈危機恐損功名又恐犯議論乃悔前慮後冀一當逆酋而盡洗生平之爲快蓋前此使功今且使過皆不可少也臣願是其言比臣至渝見綆察其卒

伍器械頗多精利似留心者既進而與之深言論以留用之意綖乃感激嗚咽謂半生驅馳頗效微勞今不自意被不美之名以去誠得一當逆首願食其肉寢其皮以間執人言而少雪官謗死無所恨臣乃知綖果可用也夫天下之將才多矣亦何必綖顧綖有可用之才又有效用之志且川省邊播分東南二路得二大將分管進兵成功尤易則綖亦曷可不留顧臣又有說焉綖欲效用而臣不留則臣負綖臣既已留綖而綖不能爲臣了播事則綖又負臣臣負綖猶可綖負臣且令臣負國此不可之大者也臣今與綖約如綖而一意滅賊立有奇功臣不難從優議敘以

酬勞勤如綖而止翼一當播事以塞人言摸稜觀望因人成事甚至爲所不可爲有如向來悠悠之議則其負臣負國也滋甚臣且暴白其罪請以尙方從事綖卽恨臣臣且甘之矣臣得便宜從事先發後聞已令綖管川東一路吳廣管川南一路會期進剿輒敢以聞伏乞敕下兵部議覆允臣所請將綖卽令以新銜領兵剿播俟賊平之日聽令赴任另行論功敘錄地方幸甚緣係天討方張師期在邇乞留調用大將分路進剿以便責成以收全勝事理未敢擅便爲此具本專差承差楊照齋捧謹題請旨奉聖旨兵部知道覆奉聖旨劉綖屢經參論已著革任懲劄旣該總

督說進兵在邇分布已定一力保來姑准充爲事官領兵
勦賊着他奮勇報效一體敘賞如再負恩驕縱誤事重罪
不饒

而以天下之大勢論之亦甚不均矣况天變相尋山流未
息上天譴告之意若有所待何可視爲泛常而莫之省憂
耶伏望我皇上上體天心下恤民命急罷礦稅取回內臣
庶乎民生稍蘇而天變可弭卽播酋聞之亦將奪氣而酋
之黨與聞之亦將曰朝廷專力征剿若此必有擒逆酋以
自贖者矣緣係災變異常人心洶懼懇乞聖主急罷礦稅
以蘇民生以回天意事理未敢擅便爲此具本謹題請旨
奉聖旨未下

查叅失守龍泉司官疏

題爲播賊侵擾黔境攻陷土司查叅失事人員以肅軍政事萬曆二十八年二月初三日據貴州右監軍道布政司右參議兼按察司僉事張存意呈稱本年正月十六日據思南府申本月初六日據防守本府煎茶溪關把總黃明儒報稱播酋楊應龍統率步兵六萬馬兵三萬於初五日殺破龍泉司本司駐鎮守備楊惟中帶兵先於十二月內將家眷送往本府附近鸚鵡溪避住該司止有土官安民志兵五百名在司今被殺虜告急會移石阡請發大將重兵庶得堵禦等因呈報到府初七日據偵兵回稱龍泉司

初五日寅時播苗數萬擁至龍泉就將本司井鳳凰山營
俱圍劄數層一湧進入已將土官安民志吏目劉玉鑿緝
虜去訖遺失本司印信楊守備於初四日徑至鸚鵡溪潮
底河下潛住本備今又帶兵復見住鸚鵡溪未回播兵尙
劄龍泉附近地名魚跳不知何爲等情據此查得楊惟中
失事潛入鸚鵡溪避劄本府聞知就於本月移會楊惟中
帶兵回守龍泉立功以圖一創至初九日惟中回稱龍泉
切近播境深居虎穴逆酋近來狂逞勢焰愈猖本職部兵
不滿二千彼酋兵馬動稱數萬眾寡難支本年正月初四
日本備出謁分守道面議地方事宜行令把總李君寶協

同土官安民志料理地方行至地名煎茶溪於初五日程時據報逆酋楊應龍督兵出犯龍泉本職星馳急回至地名沙灘分兵殿後堅持其千把總李君寶等督兵與賊對敵自卯至午彼兵勢眾約有數萬我兵寡少難支被賊在陣縛去土官安民志吏目劉玉鑾死傷官兵查實另行呈報我兵殺死苗賊亦多急難割取首級彼酋稱言欲要長驅直入思南等語本備帶兵聚劄鸚鵡溪堵截虛實情詞希圖倖免據此查得本備標下官兵一千八百名俱係自行遴選召用糧餉按月徑自覈支此外又有湄潭永靖哨把總胡效忠標下月糧本府亦按月聽支不缺其前被殺

虜錫落馬頭綏陽等哨亦龍泉所轄隨該本府稟白帶管
分守道郭參政發把總丁文明兵五百名黃明儒兵五百
二員名又發陸希管兵三百二十二員名前去煎茶溪日
頭崖等處相機接應去後至正月初五日楊惟中一旦離
遁遂使逆酋乘虛侵犯致失司印流禍至此今據各所報
前情應合通報除行駐鎮石阡都司錢中選督兵前去應
援及另文申請大兵外據此該本道看得龍泉乃思石二
府咽喉孤懸賊境士馬單弱自趙仕登授首以後逆酋揣
知天討難容輒敢乘虛衝突節該本道呈詳兩院行令添
兵固守續奉本部院許發陝兵施兵俱一時不能齊集彼

賊勢猖狂固非數千兵所能捍禦而鄰鎮隔越又非一二日所及救援者也及查副總兵陳良珝駐鎮偏橋一月頗有調停守備楊惟中堅守龍泉二年並無失事但讀原奉題議思石龍泉皆良珝應援之信地况當賊眾入犯司治官印賴惟中協力以相保今據該府備報前來反復參詳在陳良珝以急守偏橋為詞而屢催不去同舟共濟之義則疏在楊惟中以公出思南為解而懇留不允事不避難之忠未盡情若可原法難并貸等因呈詳到臣據此卷查先據帶管思仁道布政司左參政郭廷良思石兵巡道副使路雲龍與石阡府并龍泉司土官安民志節報二十七

年十二月十八日播目何漢良朱敬等統領賊兵數萬一
由錫落關將把總喻時興哨官刁榮賢楊廷貴與馬頭山
把總李惺三俱各殺死虜去喻時興兵一百五十名當斫
死五十名餘一百名用木靴穿繫一路由龍洞哨一路由
穿礮哨一路由三跳哨樹去把總蕭才一郭明選并兵一
百二十名一由綏陽哨樹去把總冉文燦將永靖營大毛
坪等各哨房盡行燒燬官兵殺傷大半及稱要攻龍泉思
葵等因到臣看得龍葵思南事勢已急彼中兵力不敷原
議發調到陝西馬兵一枝應援於時陝兵方至馬力已疲
計至彼中已不能戰徒損馬耳因急催原委雙流縣知縣

鄧宏烈將所調湖廣施州衛土兵八千盡發彼中由大田所黔水縣直趨婺川應援又恐兵未卽來一面行總兵陳璘及偏橋副總兵陳良玘發兵防守一面傳總兵監軍道行綦江南川一帶防兵突入播州地方鵬勦營寨以牽其內顧仍行該府縣文武官員竭力固守以待援兵去後二十八年正月十七日又據思南府申據龍泉長官司應襲土舍安養極報稱本月初五日逆酋楊應龍統兵數萬五道並出有叔土官安民志親領募兵五百出戰因眾寡不敵追圍城內將司治並印信民志圍困數日樹去吏目劉玉鑾並妻媳子殺死訖一切殺虜俱不忍言等情看得播

苗數萬已圍龍泉深入受水逼近本府止有三十餘里勢甚危急本府戍守之兵僅一千餘名恐不能支施南兵八千尙未見至且帶管守道業已上省而同知推官俱以公事他出惟本府一人誓與士民矢心共守未竟何狀又據守備楊惟中呈稱龍泉逼近播境部兵不滿二千去年十二月十八日逆酋恃眾突出殺虜職下名色千把總四員兵三十餘人至今年正月初四日卑職循例出謁郭參政面議地方事宜行令把總李君寶協同土官安民志料理地方行至地名煎茶溪初五日辰時據報逆酋督兵出犯龍泉星馳急回至地名沙灘分兵殿後堅持等因到臣看

得賊寇龍泉已非一日守備楊惟中身膺重寄職在設防
正當兩軍對壘之時不行揮戈相向卻乃假以循例赴道
擅離信地致賊長驅直入攻破司治緝殺官兵失事重大
且守巡該道均有地方之責不行親臨彈壓委而去之是
何情弊據法通應叅究但念用人之際姑且從寬一面行
令戴罪殺賊一面嚴查失事員役另報間本月十八日又
據防守婺川管參將事原任守備徐允爵呈稱本月十一
日據本縣石將關防禦土舍謝正民報稱探得播酋點選
苗兵三萬只在三五日內出境攻犯婺川圍占思石二府
本關兵微緊要稟乞發兵堵截等情轉報到臣看得龍泉

既破婺川阡危調發官兵俱尙未到萬一失陷旣礙進兵更費恢復一面將調守武隆彭水平茶土兵五千名建越官兵五百名行令坐營孔繼祖統領前去救應一面再行總兵傳諭各路防勦官兵處處相機進攻以牽賊勢使其內顧以解此危間本月二十五日又據分巡思石二道及思石二府復申楊惟中先期徑至鸚鵡溪將家眷移送潮底河下潛住以致誘苗入境等因該臣看得本官身爲將領定有地方乃賊未來輒挈家而走擅離信地遂爲逆賊所乘土官安民志率兵夾攻身罹鋒刃所部軍民無兵救援悉遭荼毒皆由本官坐視以致大失軍機法應拏究會

行該省撫臣臯仰該道卽將楊惟中嚴拏解道監候依律
招參以憑處治間本月二十八日又據副使路雲龍呈稱
龍泉爲思石鄰播屏障特設守備統以重兵捍禦無非爲
保固地方計也今守備楊惟中素負虛名臨事畏縮以致
印官被其殺虜城寨由其失陷據法委應參究但兵事方
殷用人正急今據本官旣稱情願恢復龍泉贖罪以待大
征似應呈請裁酌或於任法之內姑開使過之仁容令戴
罪督兵前往龍泉恢復以爲大征之地并於煎茶溪等要
隘處所防禦立功以贖前罪等因到臣批行去後今據前
因該臣看得逆賊楊應龍頗號知兵其於批亢擣虛攻瑕

潰堅戰守機宜圖之稔矣當臣發成都抵重慶也計賊自知罪無所逃必且東衝西突冀得一逞以暫固羣苗之志而預寒我軍之膽於是傳檄三省催僱兵糧踵接於途日以數四卽湖貴撫道亦非不日有報章各稱料理而地遠備多猝難齊一至如龍婆思石一帶去三省各千里而遙兵力素虛援兵難至逆賊居中窺瞰於此地首甘心焉而龍泉遂不免矣據所稱地係土司原無城池漢土之兵不滿三千賊親率大兵以歷之眾寡不敵亦難責以全勝願將死官也不能戰則守不能守則死舍此之外甯有良策今土官安民志以五百孤軍當數千強虜致命遂志豈不

烈哉楊惟中素有虛名擁兵二千相機職守以待援師卽
兵刃一接亦可自解乃先事而去自保其家此何心也豈
該堡設兵二千止爲伊保護妻子之地耶當警報初傳臣
卽一面催兵應援一面發兵鵬勦據監軍楊寅秋揭稱近
據吳洪等塘報賊破龍泉移兵欲攻婺川因蜀兵報警遂
撤兵回查賊以初五日破龍泉以初六日撤兵回則所云
蜀兵報警卽南川正月初一日金竹寨之捷有以牽之也
不數日而再有官壩大營之捷賊遂至今不敢南向而施
州之兵且及黔境向使惟中但守三日卽龍泉至今與思
婺並存亦不可知嗟嗟一將全身萬民委命臣於惟中恨

不食其肉寢其皮矣龍泉係貴州總兵地方近該臣題允屬湖廣偏橋總兵就近管理但童元鎮遠在貴陽陳璘方入沅州於勢俱不相及卽副總兵陳良玘亦有應援之責然偏橋方在危急本官僅堪自保本地將領已避何可嫁罪他人俱應免議帶管兵備分守參政郭廷良以初四日送印以初五日失龍泉殘破若此綱繆謂何似難與未接印之兵巡副使路雲龍並論者參照守備龍泉都司楊惟中狡詐止博虛名惟怯全無實效擁三軍而遠避奚取於擐甲操戈保入口以自完安在其折衝禦侮已失重地何得苟全宜從守備不設之條尙有臨陣在逃之律此一臣

者所宜提問正法者也分守參政帶管思石兵備事郭廷
良處瘠薄之區拮据非不稱苦值殺戮之慘防禦終是未
周難謂代庖遂可逃責此一臣者所宜量加罰治者也及
照龍泉初報失事臣已行該道將楊惟中拏問正法後據
該道稱惟中欲以恢復自贖臣因彼中別無將官援兵難
以猝至恐賊遂長驅思南因姑令質其妻子於獄限以十
日內恢復龍泉以待大兵蓋因賊勢方張別有失陷不便
進剿故爲是不得已之計要之本官縱有復龍泉之功亦
難盡贖其失龍泉之罪仍應提問定罪除殺傷官兵虜掠
人民查明另報外伏乞敕下吏兵二部覆議將楊惟中行

巡按御史提問正法將郭廷良罰俸示戒其童元鎮等姑
行免議庶罪當而人服法行而功奏矣至於臣化龍有遙
制之權無保全之效失職已甚負罪爲多但方在進兵未
敢求罷除席藁恭聽處分外緣係播賊侵擾黔境攻陷土
司查叅失事人員以肅軍政事理未敢擅便爲此具本專
差承差黃可美齎捧謹題請旨奉聖旨該部知道覆奉聖
旨是

報進兵日期疏

題爲播賊造逆奉天征討恭報師期以張聖威以一眾志
事臣惟播賊楊應龍逆天造反殺將屠城皇上赫然震怒
興師問罪不以臣爲不肖舉兵柄而授之又頒尙方之劍
而賜之委任甚專責成甚重亦旣數月於今矣當臣之初
受命也計惟除君之惡義不返顧滅此朝食豈俟問哉顧
賊勢甚張我力甚微較量彼己未宜輕易乃不動聲色以
緩其勢急集兵糧以厚其防旣而兵糧稍集可以守矣未
可以戰也乃復按兵不動以示之不測益廣調發以圖爲
必勝蓋自秋徂冬川省之兵力始充器械始備糧運始齊

湖貴二省極力催餽亦漸有端緒外省調兵亦漸有至者
臣計此時不但自固可以圖賊矣乃遂移駐重慶就近調
度而是時各省兵亦先後至參將周國柱以固原陝西兵
遊擊奈世威羅星都司哈光顯以甘肅兵遊擊任承爵以
河南兵俱十一月至參將李經以延綏兵十二月至都司
封建以浙江兵守備趙賢輔以山東兵坐營王芬以天津
兵管守備事指揮沐榮以雲南兵守備白明遠土知州岑
紹勳以廣西兵俱今年正月至總兵馬孔英以甯夏兵二
月至其三省所調土司兵酉陽石砭永甯天全鎮雄平茶
邑梅水西各久在防守烏蒙施州散毛容美永順保靖烏

羅獨山等各報已起行計二月初俱可至而先是臣行本省司道及二省撫鎮司道所議分路分兵分定文武諸臣漢土官兵亦以正月初先後報至大約分爲八路在四川爲四路一路綦江以原任總兵劉綎爲主將而以參將麻鎮遊擊楊敏政都司程試周敦吉守備趙賢輔周以德坐營王芬等隸之參政張文燿督兵糧兼紀功而以同知史朝貞等佐之一路南川以總兵馬孔英爲主將而以參將周國柱李經遊擊任承爵王之翰守備萬民英都司葉當春坐營孔繼祖土官宣撫冉御龍馬千乘長官楊光祖楊光斗等隸之僉事徐仲佳督兵糧兼紀功而以推官高折

枝等佐之一路合江以總兵吳廣爲主將而以遊擊奈世威羅星都司哈光顯封建趙應科吳從周劉承職等隸之參議兼僉事劉一相督兵糧兼紀功而以馬湖府知府蔡宗憲等佐之一路永甯以原任副將曹希彬爲主將仍聽吳廣節制而以參將吳文傑王夢吉守備江萬化周大謨土官宣撫奢世續等隸之參議史旌賢督兵糧兼紀功而以州同趙世德等佐之外有臣標下中軍副總兵楊登山及參將余德榮遊擊江萬仞等領用標下兵爲遊兵往來策應史旌賢先總管水運今水運將完而本官已題陞敘瀘副使候命故以之管本道兵糧曹希彬先以到遲被參

奉旨提問而木官先爲永甯參將甚得該司官兵之心今所調該司兵獨多須以希彬監押之乃可用故暫釋而用之俟事完另議其川東兵監以參政張棟川南兵監以參政謝詔此川省之大較也在湖貴爲四路一路烏江總兵童元鎮爲主將而以參將謝崇爵守備陳雲龍沐粲白明遠中軍張澍劉岳土官知府隴澄知州岑紹勳等隸之參議梅國樓督兵糧兼紀功而以推官張應選等佐之一路沙溪參將朱鶴齡爲主將仍聽童元鎮節制而以土官宣慰安疆臣等隸之副使洪澄源督兵糧兼紀功而知州王應昌等佐之以上二路兵監以按察使楊寅秋一路興隆

總兵李應祥爲主將而以副將陳寅參將楊顯劉效節守備汪如淵土官宣慰彭元錦等隸之副使尤錫類督兵糧兼紀功而以知州陳聖佐等佐之此路兵監以參議張存意一路偏橋分爲兩翼一由白泥總兵陳璘爲主將而以遊擊江騰龍都司于繼勳吳時喬守備王之棟朱桂芳邊上將土官宣慰彭養正等隸之參議詹啟東督兵糧副使王應霖司紀功而以同知張羽鴻等佐之一由龍泉副總兵陳良珝爲主將仍聽陳璘節制而以參將王一桂都司錢中選守備徐允爵土官宣撫覃宜覃玉鑑安撫田大豐等隸之副使陳興相督兵糧副使路雲龍司紀功而以推

官吳天佑知縣鄧宏烈等佐之此路兵監以按察使胡桂芳參議魏養蒙其二省撫臣副都御史郭子章仍在貴陽僉都御史支可大移住沅州各調度此湖貴二省之大較也臣又惟三省道里延長官僚眾多卽在事文武諸臣臣且不知其面安知其心一有懷私敗羣者干其間誤事不細是必盟之於天以一其志乃於正月十五日臣先率川省總兵司道及大小文武官兵於重慶之演武場設天地日月風雲雷雨山川社稷先聖先賢之神位而告神爲盟詞曰蓋聞春秋之義人臣無將漢法所誅大逆不道逆賊楊應龍者本以夷種世厠漢官被我冠裳守彼爵土輒敢

忘天朝豢養之恩恣鬼國兇殘之性初但殃及骨肉繼乃禍遍蒸黎嬰兒孕婦槩被誅夷殺將屠城以爲常事虐焰燔乎五司七姓淫毒漸於九溪二巴天地不容神人共憤皇上痛兆人之失所杜列辟之效尤遂伐暴以安民乃興師而問罪化龍等共以職守咸在戎行義當戡亂成平勢須分猷共濟蓋必三省之中文武將吏以及四海之內漢土官兵堅除兇雪恥之圖奮僇力同心之誼庶幾共獎王室乃可必得罪人茲將鞠義旅以徂征敢用對明神而作誓且夫惟忠可以報主惟公可以服人惟致死不貳可以徇國家之急惟精白無欺可以樹掀揭之勳凡在行間請

事斯語如其無貳乃心克勤王事神亦陰爲庇相俾享成
功若督撫鎮道及副參遊守府縣衛所大小文武等官有
懷姦飾詐罔上行私乾沒軍資枉殘民命妒人則以功爲
罪逃刑則以罪爲功或假公事以報私讎或介小嫌而妨
大事或以是爲非以非爲是任一己之見而失三軍之心
或當進不進當援不援偷一時之生而戕萬民之命或懷
忠不盡退有後言或臨事避難轉生枝節或賞罰功罪之
不明或南北漢土之異視或持兩端而規利或罔三尺以
徇情或造疑似影響之說以傾人或挾機械變詐之術以
利己有一於斯卽爲負國負國之人其名爲賊明神殛之

死不旋踵逮及闔門永絕其嗣夫神聰明正直而一者也
有人負國而不知聰明謂何有人負國而不誅正直謂何
有人負國而不知之誅之有不徧有不平一之謂何夫神
護國祐民以食其報者也神不明則士不奮士不奮則賊
不滅賊不滅則民不安民不安則兇年殺禮於神亦有不
利焉敢盡布之明神惟明神其圖利之臣又惟軍中之事
三令五申宜有告誡乃爲軍誓照得我國朝方制萬里四
海一家率土之濱悉爲郡縣其在西南一帶特從往制仍
設土司原欲因俗爲治令之保境安民下延宗枝上作藩
衛隆恩大德山高海深二百年來相承無替乃有逆賊楊

應龍者梟獍爲心蛇蝎成性藐國法如兒戲刈民命若草
菅以疑似殺妻而並害其家以殘暴殃民而盡絕其世同
知原係寅僚斬殺俾無遺種五司原同手足翦滅盡作荒
邱初但肆惡於一州繼乃流毒於三省白石口民兵三千
積骸遍野飛練堡官軍二萬流血成淵遂爾比戈稱干因
之陷城殺將綦江一破百里無煙東坡再焚三春如赭最
可恨者對夫以淫其妻對父而姦其女尤可駭者吮乳斷
嬰兒之首驅蛇入孕婦之陰迹其數載殺人已盈十萬擬
以五刑議辟統備三千大逆無道天地不容賊子亂臣神
人共憤本部院欽承聖命特任專征地連三省幅幘萬里

而遙劍賜尙方宣暢一人之令糾燕秦趙魏之士提滇廣
吳越之豪艦舳連雲粟堪填海戈矛蔽日甲可成山殺氣
與玉壘爭雄軍聲並岷江等壯以此制敵何敵不克以此
圖功何功不成茲當百道並進之時宜有三令重申之命
凡我將吏共聽誓詞一昔人有言主憂臣辱主辱臣死逆
賊破城殺將荼毒生靈辱朝廷羞當世甚矣凡爲臣子義
當不與共戴天三省文武各藩兵將誰非臣子誰無忠義
旣已受任討賊豈可更有他念乃或持貳心懷觀望計利
害憚勤勞心有所見而不言機有可乘而自失忌人之功
而造謗掠人之美以歸已事前不慎事後則委罪於人爲

國甚疏爲身則無所不至凡此不忠不義犬豕不食其餘
神明殛之永絕其嗣本部院以此自警願與同事者共之
一本部院謬司三省戎務在蜀者不敢不勉在湖貴道阻
且修雖鞭之長不及馬腹其勢然也左提右攜以綏靖西
南一方實惟兩省撫院是賴諸所應行敬受成事借以圖
功借以免罪不然者不同功而同罪矣一三省總兵係一
方三軍司命一切進取攻守本部院但約束期會指授機
宜臨陣出奇並不中制主客土漢官兵盡聽節制但有抗
犯悉按軍法若主將驕蹇剛愎逗遛縮朒爲賊所侮憤事
殃民則有尙方之劍在一監軍道奉有專敕責成甚重內

贊本部外督各營軍中大小事體無所不得問若其任情專已疆人以難玩愒摸稜失事之會是謂自溺其職本部院何敢私焉一督餉道職專糧運十餘萬人張口待哺須常有一二月之儲乃得宿飽不然臨渴掘井何有及焉乃若收放不時糠粃不堪斛斗不符軍得虛名民受實害此當與無粟同則非所望於該道者一守巡道防守地方稽覈兵馬催償器具百務所叢當宵晝圖之猶恐日不暇給至於進攻之後紀驗功次督發糧運尤須事事親理無但託之委官儻有疏漏所關非細悔曷及已一大小將領專爲討賊而設賊不平何面目見人何顏色同鄉里若平時

不束軍士致劫掠爲害加等罪之若臨陣分有信地定有師期當進不進當攻不攻甚至臨陣而退畏難而逃或迂路以避賊鋒或亂行而納敵侮諸凡此類無論大小俱以賜劔從事一主客官兵養之千日用之一時必須奮勇克敵爲國分憂方稱男子若器械不修行陣不明但圖冒餉不圖立功甚或無事劫掠以充囊臨陣畏縮而先退但犯重情各將領俱得斬之以徇一一切小委文武官員食祿盡職自是本等况事後優敘尤宜勉圖若因循玩愒畏縮退避致誤公事或不潔不公致招物議者事發審實輕則細打重則以賜劔從事一各省土司官豢養二百年來朝

延之恩天高地厚今逆賊得罪朝廷正爾等竭忠報效之時尙有無知苗獠唱爲兔死狐悲之說不知兔狐同類之物也今應龍爲反賊爾等爲忠臣已非同類何得相比若平時不能束兵致搶掠爲害臨陣不能鼓勇或懦怯不前又或以一二陣塞責不待賊平驅兵而去如此之類皆謂之不忠皆播州之緒也賜劔具在斷不敢私臣又惟軍中之事明罰敕法乃可用眾乃爲軍令照得將將者必賞罰明信而後可以服英雄豪傑之心將兵者必紀律森嚴而後可以獲戰勝攻取之效本部院欽承上命討逆遐方自非三五申令以齊烏合之情何能億萬同心以奮薦揚之

氣所有條誠特用申明法在必行將無迴令各宜蚤計庶免後艱計開一定有師期後期不進當開刀而不開刀當合哨而不合哨者主將以下皆斬一臨陣退縮不前者當時立斬以徇一前鋒破敵後鋒割級賞功之時以前後鋒分三七給賞若前鋒貪功割級致賊奔逸或爲所乘者斬一爭搶割級者斬一臨陣在逃及詐稱疾規免者斬一別隊別哨若被攻圍應救援而不救援致有失陷者領兵官隊長皆斬一將卒有私讎至臨陣以相報復者斬一妄殺平民及將老幼婦女或投戈乞降之人濫殺充功者審實處斬一臨陣爲賊所餌貪取財物及賊未殺盡而卽入其

家取財致敗者斬一賊來可出軍而不出者斬一哨探之人不覺賊來者斬一劄營內地焚人房舍淫人妻女搶人財物者俱以盜論審實處斬一洩漏軍情於賊者斬一拏獲姦細得財賣放者斬一放火及失火致延火藥者斬一剋扣軍糧致失士心取敗者斬一指以招降索取投錢接檢財物隱匿婦女致阻遠人向化之心堅其從賊之志者斬一將吏受贓枉法及論功定罪故不以實者斬一訛言誑惑妄說陰陽卜筮神鬼災祥惑人者斬一俘獲賊屬子女及被虜男婦隱匿入己不卽報官者細打一百臣於是日誓告發令訖卽行湖貴二省無鎮期以二月初三日

亦如臣誓告臣又惟兵將漸齊人心已一可以約期行事矣乃密行本省鎮道及二省撫鎮司道約期行令各照分定信地獎率文武將吏漢土官兵的於二月十二日一齊並進開刀剿殺除再屢行申飭督併去後該臣看得逆賊楊應龍違天造反罪不在赦人人知之願遊談之士所稱決勝之策往往不一蓋有難易遲速兩端以爲易者謂應龍小豎子耳播州一隅之地在海內如黑子著而且其眾叛親離人無固志大兵一舉至則靡耳剿之宜速而不知困獸猶鬪賊故知兵又以威劫其下用命者多蜂蠆有毒談何容易白石飛練已事昭然以爲難者則以其據險負

固一夫當關萬夫莫開至擬之南倭北虜爲甚謂不宜與爭鋒止多集兵而四守之可坐困也顧坐困須多兵多兵須多餉令東西南北漢土之兵各數十萬而事久不決老師費財何以善後夫兵猶火也不戢自焚意外之虞且不在播夫兵覩拙速未聞巧之遲也蓋臣每顧念於難易遲速巧拙之間神馳心碎腸一日而九迴矣自受事以來日分而食夜分而寢督兵餉治器械輪蹄四馳星霜倏易數月於茲始有次第又念三月以後草青瘴發雨多河漲便難舉事須至秋冬後來事勢都不可知瞻前慮後師期須當以二月定又先經兵部與臣題過賞格及臣所爲諭苗

雜言分行各監軍道多方開示招諭而各監軍亦殫心畢志四路招降節據開報川貴二省所收投降者不下數千而賊之心腹逆黨李旭以間死趙仕登以計斬其外司長官鄭葵駱麟王繼先袁年陸續出降送妻子爲質以表忠順賊恐人心遂離努力破龍泉以張威而不虞金竹官壩之捷又有以禡羣苗之魄而奪之氣亂而取之實惟此時謀之二省撫臣及三省道將咸以爲可故臣遵奉屢旨成師以出以皇上神武威靈計賊當不日授首臣愚不肖無能爲役惟是主憂臣辱主辱臣死竊以自盟賊亡則朝天有期賊在則歸闕無日竊願效於昔人徇國之義他何敢

知焉臣謹具疏先以師期上聞無任悚息瞻望之至緣係
播賊造逆奉天征討恭報師期以張明威以一眾志事理
爲此具本專差承差高廣勳齋捧謹具題知奉聖旨覽奏
知道了兵部知道

二報捷音疏

題爲王師進剿連破劇賊險洞招降脇從羣黨再報捷音
事本年三月初一日據川東監軍道參政張棟報准原任
四川鎮守總兵官劉綎報稱奉臣軍令遵依於二月十二
日出師進剿緣綦江一路自東溪入播地方俱係窮山峻
嶺深崖茂箐內如楠木山羊簡臺等洞皆天造地設險固
爲逆賊頭目穆炤楊真母柱等盤據其中必須剿除乃堪
前進又准監軍道手本內稱首命各洞惡目楊兆麟張漢
清郭通緒母柱穆炤周俸祖等六提調共統兵八九千先
來東溪一帶地方劄營又於松坎地方修截二路探聽大

兵出日應龍親統苗兵四萬前來迎敵隨該本鎮行令坐營都司周敦吉等領兵由土塵等壩攻山羊洞之右以旗鼓官陳策等接應把總趙奇等領兵由兩河口等壩攻楠木洞之左以守備陳大綱等接應又令守備周以德等由土臺等處攻二洞之中本鎮親統守備徐珊等應援并行都司王芬等領兵從江津由丁山里楊木田點腳壩攻簡臺洞以絕楠木洞之援分定發行十四日到李漢壩前哨望見賊眾來拒天晚彼此剗營十五日黎明與賊大戰我兵連贏數陣當陣斬獲寨長頭目李曰貴陳榮等功級一百零六顆生擒賊首賊從朱子真新苟等二十八名各賊

奔回楠木洞我兵乘勝追趕連破二關各賊齊用強弓硬弩滾木礮石死拒洞門難克該本鎮親詣洞前相度地形申嚴號令懸賞銀三百兩督令劉可眷等部下衝鋒兵士一面於洞前找廂對敵一面於洞上伐木運草堆積洞下舉火然燒又弓索找櫃從上放下內安鳥銃手攻打洞門連三晝夜奮勇先登者當行重賞臨陣被傷者併加優恤因而兵氣愈振加之火焰入洞煙逼各賊魂消勢難抵敵於是三洞先後盡破在楠木洞生擒賊首二十二名斬獲賊級一十六顆俘獲男婦三百四十九名口奪回被虜男婦一百五十三名口在山羊洞斬獲首級六顆臨陣乞降

賊首男婦六百三十一名口在簡臺洞各賊拒敵甚堅都
司王芬等奮勇打開洞關四重生擒苗賊三名斬獲賊級
三十九顆俘獲男婦五十六名口招降男婦五十四名口
奪回被虜男婦十一名口燒其敵樓倉廩毀糧二千餘石
奪獲槍刀弓弩器械牛馬牲畜無數陣亡提調余崙兵王
勇等四十一員名重傷官兵封學仁等四十八員名輕傷
官傅貴兵秦守等三十四員名本月初三日又據總兵劉
綖呈稱本職自破三洞之後整兵進取至二十九日戌時
據各哨役鄉導報稱逆酋遣子楊朝棟等統苗數萬分三
路大出一由落爐壩埋伏一由羅天溪衝我羅古池營壘

一由松坎前來迎敵我師應龍親統諸巢之賊劄於頂山關內各處及令朝棟分兵一枝由兆陽水小路出點腳壩先劫都司王芬之營復攻本職大營本職先慮王芬孤懸令來合營以便策應於是連夜傳令守備徐珊等八員各帶兵劄於羅古池并松坎一帶地方設伏以待有警殺回應援以周以德等九員接應又密令王芬發兵於營外鴛鴦埋伏賊來擒斬以周敦吉等六員接應至初一日丑時楊朝棟等果先來犯本職親率官兵并各家丁日本降夷達子與賊大戰從寅至午三路夾攻幸收全捷共計生擒惡苗十五名斬級一百七十三顆奪獲馬匹盔甲弓弩槍

刀等件甚多楊朝棟抱頭鼠竄哭泣而逃幾爲所捉其餘
遍山爬草奔命四散等因同日據川南監軍道參政謝詔
報准鎮守四川總兵官吳廣報據永甯監紀官嘉定州同
知趙世德報准永甯宣撫司名色守備傅廷鑾并據該司
提調袁巽向守忠申奉院道諭牌遵依招撫過播州淘洪
灘長官安守邦安鑿羅國明羅國仁羅國顯等引領昇民
三千餘名口到營投降卽同本撫總管劉國用熊應山議
令安插本撫石寶寨內地居住等情報道照得淘洪安羅
等寨自去年十二月內屢差傅廷鑾等投降猶豫未決今
見大兵劄營聯絡攻打在卽又見營中豈有降旗遂率家

口族眾歸降其爲真誠無疑各等因到臣案照本年二月日期不等據川東監軍道參政張棟報據南川監紀官重慶府推官高折枝報稱南川一路大兵該副總兵周國柱參將李經統領於十二日起發至十六日經過明月山有劉九寨陳九寨中山寨各苗拒險不服勒兵打破斬首六十二顆生擒七十四名口又稱石砭司宣撫馬千乘領兵前往神衛壩劄營遣千總馬廷培等前去哨探開路以便進攻十六日行至赤崖將近土坪遇賊劄墩雄拒險道把隘我兵稍前卽發礮石弩箭傷兵二名於是官兵奮勇直衝破壘斬首四十顆官妻秦氏報效親兵秦日雲等斬首

五顆餘賊奔逃又據四川領兵總兵官馬孔英報據酉陽司宣撫冉御龍報稱率兵前進清溪劄營二十六日過河行至地名礮子山遇賊伏路我兵相與敵殺當陣斬獲賊級五十四顆把總冉大周等斬首一十四顆奪獲槍刀弓箭盛甲三十餘件又據湖廣監軍道參議魏養蒙呈准偏橋總兵官陳璘手本報稱官兵遵照師期分路並進十五日前哨至黃溪寨遇賊接戰官兵何棟等奮勇向前生擒苗賊五名斬獲首級二顆俘獲賊婦八口又稱本日遊擊陳策等督兵按山共生擒苗賊六名斬獲二十五顆俘獲男婦十名口奪獲牛馬六隻槍刀弓弩十一件又據貴州

布政司呈據石阡府申據把守葛宋濠陣關把總馮碧等
飛報播苗點兵前來攻打本關碧與附近把總王應龍督
率彼處鄉兵并歸順苗民齊心奮勇追至白泥司斬獲賊
級四顆并將彼處糧倉燒燬百餘間房屋不計其數又據
該司呈據防禦劄佐指揮夏應龍報據乖西長官司申
稱本月初七日雞鳴時分被播賊由河渡越江至馬場將
宣慰宋承恩并親枝各舍包虜去訖殺傷守把士兵賊勢
兇勇難敵又據按察司呈據理刑張推官審得生擒姦細
二名內一名梁守富供係偏橋衛客人楊君五家丁二十
六年被播目何義虜去跟隨楊應龍族人楊統名爲老虎

軍在內與酋修國今應龍說宋宣慰不與同心令楊朝棟
楊三田二領兵一萬前來新土將宋宣慰虜去同生同死
已先於各莊取男女陪嫁等情又據川東監軍道參政張
棟報准防禦涪州都司葉當春報據把總劉應武等招降
過播州頭目何顯俊等四十三戶男婦共一千餘名口又
據該道報准南川領兵遊擊王之翰報據石砭司宣撫馬
千乘真州司土舍駱麟各報稱招降過三江里夷民羅桂
賓等三十九戶男婦共五百五名口何汝仁等招降過石
壩莊夷民周子陽等二十一家男婦共三百餘名口張廂
等三戶男婦共五十八名口趙家里播民任思且等一十

五戶男婦共一百四十二名口王永厚等三十家男婦共二百三十名口周正法周崇政等男婦五十一名口又據土舍駱麟同舍把駱慶祿等招降過播目陸珊祥等九戶男婦一百二十二名口唐宗富等一十五家男婦共一百四十七名口蘇文剛等四十四家男婦共三百四十五名口又據貴州宣慰安疆臣呈奉牌諭遵依行據防守邊界地方李稍塘目把丁良茂等招降過播目黑老虎陳阿元飛老虎阿蘇王等連散戶妻小共一百一十三房安插本司內地居住各等因塘報到臣類報聞今據前因除將獲功官兵應賞應紀聽紀功道呈解按院驗覈及投降夷民

轉行守巡等道隨宜安插陣亡官兵酌量優恤其被虜宜
慰宋承恩原係逆賊應龍之婿有謂賊虜去成婚者有謂
承恩通同伴敗投入者除候查明另報外該臣看得播賊
造逆數年於今然甲午興師賊之外司諸人率皆望風投
降以故兵不血刃而抵婁山何其易也其後時撫旋
撫旋叛賊得以修怨弄兵橫肆屠戮向時投降之人嬰孩
靡遺墳墓不保今爲之守土與夫食土之毛者非其心膂
之寄則其刀鋸之餘也懷其私惠劫於積威各有效死勿
去之心矣至於綦江一路諸苗身負屠城之罪知干不赦
之條弱者據洞自保强者嚴陣相持百里之外卽爲戰場

其爲險難尤倍各路賊又夙忌劉綎之威名欲首挫其鋒以嚇各路故遣親子率勁兵遠出間道與之相角所賴天威有赫將士用命旬日而破三洞一鼓而走羣苗至今賊子擁眾而來痛哭而去向日威稜一朝都盡亦足快矣查各路投降已及數千斬獲已踰五百計此後勢成破竹行見斬關逆賊滅亡當必有日但今天雨淋漓箐林蒼翳層崖險峻官兵一時勢難並進稍待晴霽乃可長驅夫今之行期期於滅賊賊不滅卽殺者盈城盈野降者成聚成都未爲奇也顧自進兵以來淹及二旬皇上必且關心海內尤爲屬目軍中情形會須報聞除一面嚴催三省兵將剋

日抵關滅賊外謹將連日交兵功次招降情狀撮其大凡具題伏乞敕下兵部案候事竣類覆施行臣無任瞻仰皇悚之至緣係王師進剿連破劇賊險洞招降脇從羣黨再報捷音事理未敢擅便爲此具本專差承差傅時才齎捧謹題請旨奉聖旨兵部知道本部覆奉聖旨覽奏知道了著該督撫鎮道上緊刻期會剿務靖夷氛以安地方

合江客兵交關疏

題爲客兵交關互有殺傷酌議將領以明法紀事本年二月二十日據四川鎮守總兵官吳廣呈奉臣批據合江縣申前事奉批廣兵放火殺人漸不可長仰吳總兵速行查處正法繳依奉查得啟釁之由原因廣兵曾九買米撞遇奈羅二遊擊哈都司馬頭不行避道以致兩兵撕殺實自曾九法應首懲除將曾九緝赴令旗牌下斬首遍傳各營官兵示警外合行呈報等因到臣案照先據川南監軍道參政謝詔呈據合江縣申稱二月初一日巳時領兵遊擊羅星奈世威都司哈光顯拜客回館有廣兵一人攔撞羅

星馬頭北兵喝罵當時撕攘兩兵聚合各用槍刀礮銃喊殺一處自巳至午卑職卽同都司吳從周同知李廷謙前去解散各自散去查驗廣兵圍燒袁廷采房屋一所殺死陝兵一十五名重傷三名帶傷三十餘名廣兵被礮打死三名重傷五名帶傷四十二名隨將死者安埋傷者令醫調治又准遊擊奈世威羅星都司哈光顯各塘報三職進縣回拜被廣兵一夥無故將馬頭撲打後面兵來擁出城門甘肅兵士閉門靜坐忽然礮響殺聲大震各披盛甲攻圍擁到歇處將門戶打開殺死家丁一十五名銃傷軍丁九十四名三職迴避房內舉火燒房將奈世威歇處打開

搶去戰甲弓箭刀槍掛箱二箇內銀一百五十兩戰馬二匹又殺死戰馬二匹搶去中軍官劉時雨并各軍行李器物銀兩盛甲馬贏不計其數各等情到道爲照南北之兵從來同處征進多不相和今廣陝二兵因事忿爭互相殺傷讎恨已深勢難聚合相應及早分處以便調度合就呈報又據都司吳從周塘報相同等因到臣批廣兵恣肆若此總兵官紀律何在仰會同該鎮查處問又據總兵官吳廣呈稱本職正月二十八日晚至合江二十九日早卽往瀘州與三道會話二月初一日據報廣兵曾九在街撞遇奈羅二遊擊哈都司噴怪不避喝令將棍趕打以致兩兵

遂爾相湊放銃發箭二比俱傷又銃火延燒民房一間看得師克在和今以一兵不知避道而三將坐視弗禁謀動干戈幾禍蕭牆安望其同心僂力以濟大事本當參究但念地方用人之際姑從寬假及將倡首頭目取具甘結立功贖罪等因呈詳到臣批兵不避將喝止非過乃遂糾聚鬪殺多至一十五人是尙有天日耶廣兵驕恣一至於此該鎮略無禁戢止令頭目取結立功反欲參究裨將護親兵而失眾軍之心自是兵不可用矣吳都司王知縣原文可據難據單詞爲憑雖用人之際亦不可全然廢法仰酌處妥當詳報聞又據合江縣申前事批行總兵吳廣查處

正法去後今據前因該臣看得用兵難用眾尤難彼以東西南北之人各席鷙悍驍雄之氣睚眦之忿便起戈矛刎頸穴胸以爲常事此其所以和輯而禁馭之恃有法耳故未事而三令五申以飭法也旣事而懲一戒百以正法也廣兵素稱强悍乃至當道不避將官一經譙訶便爾鬪鬪焚其居掠其財橫屍路隅道無行人萬里遠訓糜餉不貲豈欲其爲同室之鬪耶卽舉一軍而盡法之亦不爲過但人眾難以槩處且部下亦有殺傷則斬首事以謝秦兵固法之平情之當也吳廣身爲主帥禍起親兵初雖不在行間繼乃全無處置將兵若此紀律謂何幸而迫於公議梟

斬一人尙足服三軍之心杜後來之釁亦所謂不遠之復乎近日多兵相聚鬪鬪時有但隨時懲處自可貼然如南川則陝兵與酉陽兵爲酒食相激殺酉兵二人曲在陝兵臣卽令參將周國柱將陝兵之起釁者箠死一人重慶則總兵劉綎標兵與監軍道家丁爲買草相爭鬪至監軍之署曲在標兵臣卽令綎將爲首一人梟示哨官甲長細打五人於是三軍相戒不寒而慄其土兵間有爭鬪殺傷者乃夷俗常事解之卽散論之卽止難盡繩以漢法俱不足瀆聖聽惟是合江一事軍兵殺傷頗多將領行法稍遲相應具題以肅軍紀伏乞敕下兵部查議除各兵已經處分

及有無搶奪財物聽臣行監軍道查處外其總兵吳廣或
量行罰治以戒將來或念其方在進兵且已經正法姑行
免究庶乎軍士當以前非爲戒將領亦以後效自期法紀
可明平賊有日矣緣係客兵交鬪互有殺傷酌議將領以
明法紀事理未敢擅便爲此具本專差承差傅時才齎捧
謹題請旨奉聖旨兵部知道本部覆奉聖旨吳廣著罰俸

三箇月

克桑木關烏江關三報捷音疏

題爲三省征播大勝蜀黔更破險關再報捷音事本年三月初八日起至十八日止節據川東監軍道參政張棟報准川貴征播總兵官馬孔英報據南川統兵參將周國柱李經遊擊王之翰守備萬民英監紀推官高折枝各報據前部領兵石硃宣撫司宣撫馬千乘報稱二月二十四日兵至地名清溪哨得播賊何金友何金敖爐頭李武聚苗數百於播境羅桿寨鳴金吶喊把截隘口本司發兵二枝前去衝鋒至二十六日一更時分一擁抵巢各城整備槍弩向前迎敵我兵奮勇直進四圍包裹賊力難支當斬何

金友等壯級三十七顆各賊敗走追至前村復來格鬪又斬李武等壯級五十三顆又追至土坪石板溪斬首一十六顆共一百零六顆奪獲苗弩槍刀五十餘件俘獲苗婦二十餘口馬二匹牛六隻及稱本司官兵職任前鋒連勝三陣止重傷土兵秦喬等五名又據領兵酉陽司宣撫冉御龍報稱二十八日兵至播境地名十二茅坡撞遇賊黨趙四彬領苗伏路我兵奮勇敵殺斬級八十五顆把總冉大周等斬級二十三顆共一百零八顆奪獲槍刀弓箭一十八件被傷土兵吳海等四名又據報稱參將周國柱李經守備萬民英督領河南家丁兵州鄉兵於三月初一日

辰時行至地名紅花灘遇苗賊三百餘人坐草一齊擁出
截戰我兵奮勇向前敵殺斬獲苗頭汪列并散苗僧苗喻
吾等首級八顆生擒汪二一名招出投降男婦劉玉等一
十八名口奪回被虜幼男婦女李氏等十名口搶標四件
又據宣撫馬千乘報奉監紀高推官會同主將傳令眞州
清溪一帶撫勦已定速宜率師前進但此去經過長礮望
草風坎封甯大灘等隘俱係勁敵必須先破諸賊然後合
兵取桑木關方爲全勝之策等因本司職任先鋒遵依統
領部下兵馬五千於三月初一日先行諸營繼後是日抵
土坪劄營哨得賊屯望草至初三日五鼓遣兵前去進攻

行至長礮忽遇播目寨長冉海元王廷佐巴習文等統苗
萬餘預於隔河布陣迎敵皆騎戰馬勢若飛騰我兵分兩
翼奮力渡江前哨秦加南等與賊首先交鋒百合刺苗落
馬當陣斬獲首級八顆賊眾大敗拋棄戈甲我兵乘勝追
入龍鳳關連殺數陣隨蹤趕至望草二十餘里各賊復聚
添兵接應只得拚命對敵致將頭目冉蓋殺死重傷秦加
南龔朝啟等數十人正值困乏難支當得我兵秦加月等
從傍奮勇直衝陣角破賊奔潰生擒苗頭蔡明巴習文二
名斬獲頭目冉海元等壯級二十八顆奪獲苗甲兇器數
多遂埽長礮占據望草切照木司土兵與賊交鋒追殺二

十餘里功雖不多頗效血戰及據推官高折枝稟稱長礮
之捷首關外遂無立草據生擒冠帶寨長巴習文軍頭蔡
明稱望草苗兵五百家久被首取入關近發與張仕恩白
倫合兵三千拒外纔八日而兵敗坐寨冉海元王廷佐寨
長藍鳳鳴王大頭龍得勝宗莫阿里王二老皆被陣斬獨
張仕恩白倫與冠帶把總楊正貴曹全在陣後得逃餘兵
各四散走或亦有入關者是知此捷功雖不多乃擒斬賊
之頭目八九人亦足以寒賊膽巴習文係望草首惡真州
人被其虜妻女者數百家爭欲食其肉卑職當賞擒習文
石砧兵向朝榮余遠三十金將文斬於令旗之下有真民

張永清者遂取習文心對眾兵食一軍大快石兵戰死頭領二名各給銀十兩優恤此路兵將人人勇奮爭先至奮不顧身戰無遺力惟馬千乘爲首卑職當遣鼓吹送銀五十兩與千乘以示優異并申論三軍長礮望草雖破他關尙多且此路所重者桑木關若此關一破可以長驅如有能奮勇先登首剋此關者照格懸賞去後乃酉陽司宣撫冉御龍恥石柱獲功於初四日遂率兵奮勇打破風坎關斬獲首級二十七顆將關內賊寨盡焚又該卑職看得酉陽勇奮更爲可嘉亦遣鼓吹送銀五十兩給酉陽營以示優異時參將李經兵劄茅坡參將周國柱兵出茅坡口劄

半渡守備萬民英與酉石二司土兵盡劄桑木關下初五日建越提調劉勝攻打灤水羊崖等箐與賊對敵斬首一十九顆俘獲婦女八口奪獲槍刀箭弩七件初六日酉陽把總冉大周領兵與賊交鋒斬級一十七顆各賊上關加有馬兵數千相持初七日辰時各苗殺下被酉兵石兵邑梅兵河南毛兵合勢大殺一陣退關據守至未時酉陽又分兵同石砬兵併力衝鋒復占封甯關逼近桑木關劄住把總冉大周又分兵抄出黑面崖攻破大灘關又逼九杵關劄住是暮冉大周差人執木板上書三月初八日定要剋破桑木關是夕官兵鏖戰一夜致將強弓硬弩滾木礮

石拋打殆盡至次日辰時官兵奮勇復戰拚命衝突先登
至巳時剋破驅賊四散追至金子壩旋回卽於此關劄營
守定計點功級守備萬民英下部斬首級二十三顆中軍
漆太然家兵秦宗武等斬級二顆宣撫冉御龍下斬級四
十八顆把總冉大周下斬級八顆冉維嵩下斬級一顆宣
撫馬千乘下斬級二十一顆邑梅司長官楊正韶楊通榮
下斬級一十八顆俘獲婦女三口輕重殺傷我兵不等奪
獲賊仗甚多以上功次該卑職隨營辨驗真確除解紀功
道覆驗轉報外看得逆賊楊應龍所恃者諸關也當我兵
未至則布兵以待我兵既至則設防以守自謂可以挫我

之鋒以解諸路之體詎知連破數隘首剋險關是播之門
戶已去其一矣得險以守賊不足平所據漢土官兵血戰
之勞俱不可泯又據參將周國柱李經報稱初十日名色
把總熊應時引固原延綏千總李進把總王問臣白時化
李廷柏邱汝孝合兵攻打苦竹關被賊千餘擁撲前來我
兵併力奮擊卑職等下斬首三十顆內頭目三顆李進下
斬首一十四顆內頭目一顆奪獲盔甲槍刀五十餘件餘
賊敗走遂剋險關又據兵巡下川東紀功道僉事徐仲佳
呈報相同又據川南監軍道參政謝詔報准四川鎮守總
兵官吳廣報據統兵原任副總兵曹希彬參將吳文傑都

司趙應科吳從周呈據千總會大等報稱奉令攻打穿崖
國遵依於三月初一日黎明至彼望見賊國周圍險峻賊
兵聚眾屯劄查係提調郭通緒令把事苟會管劄眾議分
兵四面攻打中軍千總鄧子龍等十員領兵一枝土司總
管劉國用等八員領兵一枝各抵國下賊兵雄據國上矢
石如雨我兵銃弩仰攻自早戰至午未又以火器齊打燒
燎寨房賊兵抵敵不住我兵乘勢直衝上國賊眾倉亂棄
國奔逃又爲伏兵截殺共計生擒惡賊四名俱係重傷斬
獲壯級一百二十八顆重傷我兵五名輕傷十一名奪獲
槍刀器械數多又據兵巡下川南紀功道參議劉一相并

贊理監紀知府蔡宗憲各呈報相同又據湖廣監軍道參議魏養蒙報准鎮守偏橋總兵官陳璘報稱二月十五日兵至白泥分爲三枝前行未十里右兵前哨遇黃溪寨苗賊接敵官兵陳棟等奮勇向前生擒苗賊王松等五名斬獲賊級二顆俘獲賊婦八口左中二枝於申時直抵白泥各賊棄巢遯走該遊擊陳策等率兵踰蹤追躡時天色將暮傳令按山把總吳應龍李元敬張金張文爵等各部兵共生擒苗賊六名斬獲首級二十二顆俘獲男婦十名口奪獲弓弩槍刀十一件牛十一隻又據參議魏養蒙報准總兵陳璘報稱二月二十七日親統諸部官兵進次龍溪

地方深箚密林去四牌不遠下令諸軍益加戒嚴隨據前哨報稱前面有伏卽傳令箭躬督遊擊陳策都司吳時喬守備白元潔王之棟陳九經保靖司應襲土舍彭象崑等統率各兵奮勇向前各賊起伏趨來迎敵時方雨霽又轉順風用噴筒火箭烏銃百子銃亂發夾攻賊見兵勢難當隨卽登高據險矢石如雨有把總胡世華部下隊長謝漢月臨陣先退本職親於陣前目擊卽時斬首諸兵奮勇衝敵各賊披靡通計斬獲首級九十一顆得獲賊仗頗多及照四牌之賊素稱狡黠今官兵見斬不用命者故奮勇直前斬近百級首挫賊鋒功可嘉尙相應獎賞以示鼓舞又

據貴州征播總兵官李應祥呈稱三月初二日據副總兵陳寅奉令統領土官蒙詔土舍莫勞領兵把總安世珍等探得四牌叛賊聚集堵截職等黎明直抵播地旋水賊悉布陣虎兵當先藥弩亂射當有我兵鼓勇火器銃彈齊發槍牌抵敵大獲全勝斬級八十一顆俘獲器仗不計又據原任參將蔡兆吉統領土舍楊治隆土官張元虎領兵把總猶鶴等奉令前往天都圍進播有賊據險卽出截戰當該官兵奮勇直前敵殺賊卽敗走回圍官兵架放百子銃火箭一齊攻打登寨斬獲賊級七十三顆又據原任守備伍萬鍾奉令統領官兵攻剿三百落圍叛賊山箐險峻恃

固堵截官兵仰攻被滾石梭杆不能遽上隨該原任守備
柳國柱等統兵一枝從後路偷上火槍銃礮齊發賊力不
支前後夾攻當陣斬獲賊級六十一顆等因到職先該偵
得逆賊楊應龍選差張文相等起集四牌三國并河內賊
眾抵敵官兵及要襲糧等情隨該本職統督官兵酌定緊
要挨次前進今據攻破險圍通共斬獲賊級二百一十五
顆俘獲賊屬一十七名口賊仗器械五十三件此先聲奪
氣足落元兇之膽而褫其魄矣又據貴州監軍道按察使
楊寅秋報准貴州總兵官童元鎮報稱統督都司張秉忠
呈據泗城州知州岑紹勳督兵指揮李懋樑稟報初三日

奉令率兵前去蝦子渡用火箭射焚隔岸賊房四間初四日又奉督令官男岑雲漢兼同卑職家兵張宗義等前去河渡用火箭射焚隔岸賊房八間米二倉射死賊徒三名射傷二名本夜伏兵闕下裝塘至五更時候遇賊二十餘徒在於隔岸巡邏當卽浮水前去對賊血戰斬獲賊級一十八顆又據守備陳雲龍白明遠阮仕奇各差人飛報奉監軍總鎮親臨烏江分布哨渡整備船隻銃彈火器定限十一日齊力渡河進剿賊兵千餘四山伏草出沒沿江發矢叫話猖狂本日辰時該雲龍督率壩陽兵明遠仕奇督率永順兵奮勇爭先搶渡關嶺險絕水勢凶惡賊眾乘高

崖坎拒敵弩石俱發急難傍岸官兵用竹牌遮蔽船上岸
邊烏銃對打壩陽永順兵先登各賊破山潰竄直衝烏江
關斬獲賊級共十九顆奪獲絛被腦包長刀鏢槍不計登
時焚燒烏江關附近關邊賊寨燒埽一空煙蔽十里永順
兵陣亡一名被傷五名壩陽陣亡苗兵千總一名被傷四
名飛報前來隨該卑職會同左監軍楊按察使親抵烏江
關山頂將各哨分劄山頭據高阻險督兵齊力搭架浮橋
以通老營催督永順續到兵盡發策應一面星飛催督隴
澄把事王嘉猷兵馳赴雞家寨出刀靶水催安疆臣兵馳
赴昌田驛出落閩水催羅寵等集鄉導熟知地利偵探續

麻水把截鬼囤路溝催河渡各哨兵乘勢渡河攻打河渡關先取尙稽場以分賊勢犄角勦殺共收全捷理合飛報又據雲南廣南府知府黃宇報准統兵參將謝崇爵雲南坐營中軍張澍督陣贊畫黃龔報稱十二日寅時發兵奪占河渡關燒蕩各寨當陣生擒二名斬首十五顆又准中軍張澍報稱六營官兵往河渡督象奮勇渡關生擒播賊三名斬獲首級八顆又頂皮小功二顆陣亡被傷并所獲賊仗另行細開外合先呈報又據川東監軍道參政張棟報稱南川縣申奉監紀高推官差人押發招出降民任從章等男婦共五十五名口到縣分發地名周羅等村安插

又據推官高折枝報稱眞州土舍駱鑄招降過播民孫郎等男婦二百名口牛鼻國降民二百一十名口及稱自大兵劖賊桑木關內百姓攜老扶幼投降日以千數卑職委河南官舍王承宗家丁白有功名色把總王佐立三民寨望草山頂任民歸順不許土漢官兵虜掠賊黨日孤又據宣撫冉御龍報據土民鄭會招降過播民吳宗枝等男婦一百零四名口又據彭水縣申據快手徐廷美報稱婺川縣民方騰虹招撫過板角青龍國夷頭施阿記等十名帶領男婦一百三十七名口出來投降安插於地名洋水居住又據防守南川原任都司葉當春呈稱羊墩大里兩河

等箚招撫未出播民甚眾今聞差人羅文等執招降小旗
上書搶奪降民財物者追給殺降者抵命於是陸續招出
播民余國受等六戶男婦共二十八名口望草金竹里播
民楊永興等七戶男婦共七十名口又據婁家里民王堅
等招撫過田月等五戶男婦共二十四名口梁金招撫過
婁永興梁本慶等十戶男婦共六十三名口婁秉詔招撫
過劉友善等四戶男婦共一十三名口令狐籌等招降過
婁慶忠等一十八戶男婦共一百一十四名口又據兵巡
上川東紀功道參政張文燿呈據監紀同知史朝貞解出
降民趙應宗等二十五名口坐營都司周敦吉解出降民

易子貴等三十名口永甯監紀知府蔡宗憲申據儒溪長官袁起龍呈報招出應調降兵趙坤等三十名永甯目把胡文宗呈報招出播民鄢廷華等男婦共八十五名口又據總兵官陳璘呈稱兵進白泥各賊棄寨逃走連日督兵按山仍傳諭撫剿兼行續據領兵把總吳應龍等招得偏橋衛避難軍餘羅再鸞等十八名羅家屯羅廷鶴等男婦八十五名口興屯堡李叔生等男婦九十名口又據餘慶司土官楊鯨招得青沙寨苗民安壩阿唾等男婦一百一十七名口二關三關苗民吳老孫等男婦七十八名口石橋寨苗民阿元等男婦七十一名口各給旗號免死票照

立園安插以示不殺之仁又據兵巡上川東紀功道參政
張文燿呈奉臣批據該道并管分守川西道事副使傅良
諫會呈近准原任四川鎮守總兵官劉綎手本開稱本鎮
於本年二月十四十五等日在於李漢壩與賊大戰及攻
剋柑木山羊等洞所有生擒賊首賊從合行差官押解重
慶府監候等因該二道會同於三月十二日監取各犯前
到演武場從公鞫審得各犯頻年助暴殺虜生靈荼毒之
慘不可勝數今王師大舉尙敢拒敵阻截運道尤見兇殘
內沈坤等四十三名情極真惡法應速正典刑以洩軍民
之憤蔡角等四名雖係種類但原未臨陣似應緩決并於

各犯名下詳註審過實迹開款呈詳該臣批各賊窮兇極惡流毒綦南一帶地方久矣王師所至猶然抗敵當陣擒獲何所逃死仰守西紀功道會同標下練兵遊擊官將沈坤等四十三名押赴市曹斬首分發綦南二處梟示以快民心蔡角王明熊興望馬明尙姑監候再審此繳依奉備行重慶府將賊犯沈坤等四十三名緝發市曹該本道於本月十八日會同標下遊擊江萬仞督同該府知府傅光宅通判蕭時鳴重慶衛指揮潘胤淮高凌漢將各犯押赴令旗下各斬首訖共首級行府分發綦南二處受害地方梟示蔡角等四名監候聽審外合行呈報各等因到臣除

將獲功官兵應獎應賞應紀聽紀功道呈解按臣驗覈及
投降夷民轉行守巡等道隨宜安插陣亡軍兵酌量優恤
及將生擒賊犯批行梟示外該臣會同巡撫貴州兼督理
湖北川東等處地方軍務都察院右副都御史郭子章巡
撫湖廣地方兼提督軍務都察院右僉都御史支可大看
得初賊聞王師進剿懼關外之人不爲盡力或因而投降
乃將其頭目及稍稱精勇之人質其妻子羣之岡上約以
戰不力或遂降則屠其家以故人人死守無復他志卽臣
等招降之檄分發如雨而應者尙希比兵臨賊境則擐甲
操戈相向而死敵者爭先人矣蓋真勅敵未易與也所幸

三省諸軍激於討賊之義理直氣壯所向無前臣等又時以法令嚴督之各將領進希爵賞之榮退虞尙方之及賈勇先登所至披靡報捷之使項背相望至於南川貴陽二路則直奪大灘桑木苦竹烏江河渡諸關自是賊失其險且褫其魄矣初臣與各路主將約有先奪關者則深溝高壘據關以守直待諸路抵關相期齊入今兩路已據關以待計各路當取次而登進關之後賊或集其死黨背城一戰則我師聚而覆之固太山壓卵之形或搗其妻子拒圍自保則我師環而攻之亦圈豕釜魚之勢賊卽狂狡多方或未能終遁天誅也所有數日進兵情形理合具題伏乞

敕下兵部案候類覆施行緣係三省征播大勝蜀黔更破
險關再報捷音事理未敢擅便爲此具本專差承差周之
冕齋捧謹題請旨奉聖旨兵部知道

查叅楚省勦苗失律官員疏

題爲楚省分兵勦苗失律納侮乞賜究處以肅法紀並議
遙制事宜以一軍政事萬曆二十八年三月十七日據湖
廣按察司整飭辰常黎靖兵備副使王應霖呈據黎平府
署印推官邱獻可呈蒙本道紙牌奉巡撫貴州郭都御史
批據五開衛銅鼓守禦千戶所申據本所操舍馬朝告稱
同弟馬臣等往永從縣生理行至地名皮林擒鬼坡陡遇
苗賊各執槍刀將弟馬臣殺死緣由批道又據該衛左所
軍餘董應高告稱兄董應魁挑鹽轉至岑溝坡被苗殺死
等情行府選委能幹官員約會參將黃沖霄委官公同查

勘殺死人命是何惡苗係何姓名爲因何故逐一根究下
落令獻首惡正罪蒙此就經移會參府行委千百戶張正
蒙武繼文哨官邱明李高井本府委官吏目典史楊大棟
梁熊帶領鄉導會同永從縣相機勘處隨據各官稟稱遵
詣該寨不期各苗仍前糾眾據險操戈截路拒敵當將軍
兵王邦等殺死八九名官兵見苗勢眾掣回到縣又據該
縣稟報相同具由通詳蒙分守湖北帶管辰阮兵備道詹
參政分巡湖北道林僉事貴州新鎮帶管都清道梁參議
俱批仰府相機勘處又蒙辰沅兵備道王副使脾奉巡撫
湖廣支都御史批據本府并五靖參將黃沖霄呈據永從

縣申稱蒙委官勘處皮林寨人命事情被各苗不畏法紀阻撓勘官擅殺軍兵今復猖狂合款揚言攻劫縣治乞賜轉詳以解倒懸緣由申府備申兩省撫按批允牌行本府卽查皮林寨惡苗有無殺死軍舍抗拒委官及揚言攻劫永從縣緣由卽今應否調遣官兵相機勘處查明速報又蒙本道批據本道呈爲叛苗黑夜攻屯劫殺大變事據該衛三冉屯舍餘傳國明等告稱陡被皮林各苗圍屯攻劫放火燒燬八家殺傷軍餘楊大付家財牛禾等物一掃盡空生靈遭害等情批府移會該參勘處該本道覆看得上皮林寨最爾苗夷迺敢殺人抗斷通糧藐縣方今大征之

際一檄則甲冑如雲擒斬甚易但恐大兵壓境玉石不分
姑念大生種類不忍波及株連仰府一面出示曉諭該寨
各苗各宜省悟保守身家性命速將殺人首惡獻出認罪
照舊輸納錢糧脇從諸番俱皆罔治敢有抗違據實詳道
親提大兵鵬剿犁庭埽穴噍類不遺穴鼠釜魚追悔莫及
一面安撫永從縣屬安枕寢居無容他慮仍申諭五洞苗
民各安業土上納秋糧毋聽惡寨糾合爲非自取敗亡等
因遵奉傳諭各苗始焉接牌願聽勸處數日後復將前牌
送出聲言不服任從進征等情又經移行黃參將查議回
稱切照該寨惡苗先殺軍舍二命復殺軍兵九命肆惡已

極理法難容矧今糾眾附勢抗納秋糧合款揚言欲行攻
縣如此無狀見行撥兵常守令該縣不敢出入且十二土
司諸苗觀望人心洶洶至於五靖哨兵共有五百七十名
俱已整朔齊備衛所款兵共一千五百名亦已點齊惟候
所借沅鎮候兵六百名至日一齊舉行煩請酌議轉詳第
恐苗情日久爲患日深沿邊地方不能安枕等因覆府再
照各苗爲惡跳梁殺人無忌復戮官兵又言劫縣至縣官
難於出入本府仰體上司德意三令五申安諭撫處變詐
不常橫惡尤甚卽今四圍亂行出劫日夜不甯若不亟爲
懲艾將來縣治難以保全各司諸苗效尤士民亦難出入

貽患地方請速轉詳行令參將衙門點調官兵挾擒首惡
正罪隨蒙各道案奉各院批據本道呈據本府呈詳前因
該本道覆看得上皮林寨惡苗劫殺軍民藐法抗勘商民
不敢往來縣官艱於出入若不大加懲創則一寨狂逞諸
苗效尤地方將無甯日候詳轉行黎平府查議堪動錢糧
移會黃參將委官召集侯家兵并哨款兵及參守親兵相
機挾擒首惡正罪脇從罔治安撫諸苗庶孤縣無虞苗首
知警等因通詳巡撫支都御史批惡苗稱亂截殺官兵負
固不服罪不容於死矣仰道嚴行該府議處錢糧仍移會
黃參將督兵挾勘先擒首惡正罪仍撫諸苗無懷二心繳

又奉巡撫貴州郭都御史批上皮林寨惡苗不甚多如黃
參將力能制之則專任之但止於擒首惡餘脇從者撫之
可也仍候楚中兩院詳行繳又蒙巡按湖廣監察王御史
批惡苗劫殺法所當誅如議行仍候撫院詳示行繳又蒙
巡按貴州監察宋御史批惡苗肆虐逐殺官兵非一大創
不可候撫院詳行繳蒙此就經牌行黎平府會同黃參將
查議糧餉集兵相機挾勘安撫脇從去後隨准黃參將移
稱除劄行守備轉行衛所等官帶領哨兵款兵并鎮筸哨
守備邊上將於原調征播哨兵一千名內摘撥三百名前
來外煩爲會同挾勘轉報又准靖州守備張世忠手本奉

本道牌准黃參將移稱煩行張守備帶兵星夜前來五開
聽從本職防禦惡苗共安地方等因又奉參將牌劄仰備
卽將該哨在營各兵不必撥發偏橋更班率赴五開且共
防守以壯威勢合移查照隨該黃參將督率守備衛所等
官帶領鎮筮五靖哨兵并五開衛所款兵擇於二十八年
二月初二日同職前往永從縣駐劄撫綏皮林等寨諸苗
當出火牌傳諭朝廷恩威令獻首惡餘黨罔治但各苗肆
惡怙終執迷不服各官兵於初四日自縣詣該寨相機揆
勘值道路崎嶇羊腸險峻至本日午時據潰兵走報黃參
將督兵行至擒鬼坡被該寨惡苗糾集下皮林頓洞多苗

井無管生苗裝塘埋伏官兵經過各苗蜂擁齊出截殺將守備張世忠井五開衛指揮趙國王劉繼光千百戶張治新李承熙邢德唐世臣莫自是楊天時江應潮閔宗騫胡順化馬騰雲孔聞韶孟師孔凌善馮時選哨官邱明李高及靖州哨領兵千戶楊啟賢莊世恩陸懷忠哨官劉紹尙龍珊登時殺死井戕殺多兵亦未查的等情報府至酉時黃參將亦奔至永從縣中初五日各苗蜂集縣前周圍環繞意欲攻縣勒要退兵銀一千兩稍有不從卽攻城劫官奪印本府與龔知縣見事勢危迫多方善諭令附郭赤溪寨衣巾土生楊永祿勸化諸苗又據五靖哨退兵寫送

木刻乞借銀五十兩退苗以保多命等情隨於該縣借出秋糧絲花一千斤并隨帶犒賞銀牌銀花共七十餘兩給與眾苗後勒寫給印信承管文帖并豬酒方行解散初六日本府與黃參將龔知縣方得回府次日子時惡苗又將五開衛水井燕窩長春三堡等處盡行燒劫等因詳報到道又准參將黃冲霄手本移報相同該本道會同守巡二道看得皮林寨惡苗始而截路殺人繼而抗勘殺兵并傷五開衛款丁多命可謂藐法無忌然奉三院明文止於挾勒首惡撫安脇從誠慎之也迺五靖參將黃冲霄不堪士民辱詈卽動官兵進剿輕信鄉導逃竄之言致墮苗賊埋

伏之計倉皇奔潰糜爛眾多如此失律喪師豈容覩顏在位應合叅處黎平府推官邱獻可永從縣知縣龔一磨所屬苗民猖獗亦非恩信素孚均應責成招撫以散賊黨以安地方其惡苗俟播平之日另議剿處參將事務另文詳委原任遊擊呂應陽暫署及通詳湖貴撫按外呈乞照詳等因到臣隨批卽今剿播其餘小小苗警宜一切置之白刃交前不顧流矢勢則然也皮林寨之事甚微黃冲霄何人可任專征至撤剿播之兵以分之卒至失律喪師一軍皆沒豈不惜乎此等事從來不以一字相聞直待失機至此乃始呈報何也黃冲霄革任聽叅急擇才勇閑將代之

仍亟行各衛所州縣一體申嚴防守所殺官兵的數幾何
查明速報去後續據該道呈詳參將黃冲霄既已失事該
參事務應令委官暫署查得原任浙江遊擊呂應陽韜鈴
素諳堪以代理等因呈詳前來除批呂應陽准委用外該
臣看得上皮林之事在諸苗誠無所逃罪顧迹其始事止
於截路殺死二人此盜之白晝搶奪者耳後以兵挾勘而
敵殺八九人此盜之拒捕殺人者耳誠以盜治之懸購其
首惡離散其黨與一獄吏數游徼之力足矣卽欲問罪伸
威一勞永逸亦須播事既定鼓其餘勇亦自遊刃有餘何
必亟亟滅此朝食爲也詳其始末禍蓋獨起於該府推官

邱猷可之易言兵而參將黃冲霄之輕舉妄動幸功而貽禍也夫苗以萬數不爲不多三千兵豈易敵之而率爾深入一何急也邇來衛所兵疲敝脆弱各省皆然今所恃者乃該衛款兵千五百與其餘之零星烏合者且撤征播之兵三百並止偏橋上班之兵以益之一何易也陷入伏中略無知覺一何愚也二十世官三千甲士駢首就戮又何懦也主將奔回城門晝閉緜花千斤銀七十兩盟之城下而與之若非衣巾土生之緩頰幾有牽羊繫頸之事又何其備極醜態也蓋黃冲霄自以爲惡苗無幾一鼓下之張武功而受上賞亦足以明得意矣而不自知其兵不可用

與已之不能用兵舉數千人之命嘗試以博功名於心安乎夫將有懦者每畏敵而不出然尙足以全軍亦有勇者或與卒而併命然亦足以立節冲霄於二者何居焉此宜蓋失機本法寘之於理始足償二十武職之冤命而慰三軍之幽魂者也若邱獻可者不知兵又不知將倖一擲以快雄心而不意其流禍至此極也顧其事在將領將不足任彼亦無如之何此宜量行議處以警文職之喜事者永從縣知縣龔一磨始事旣鮮綱繆臨事又失駕馭損威貶體貽恨一方亦應並議罰治以警庸懦者也若該道副使王應霖地其所隸兵其所司失律納侮何以自解第其始

而持議原止挾勘而未及征勦繼而舉事方駐偏沅而不
在行間當該參倉皇苗警之秋正該道拮据播事之日所
宜量行罰治以戒失職仍候播事通諭以責後效者也顧
臣尤有說焉臣之得督三省也以征播則一播之外餘宜
勿問矣顧征播豈易言哉士馬不精疆則不能征錢糧不
饒裕則不能征人心不齊一地方非甯帖則不能征此宜
舉三省之遠近上下一意從事而後可襄厥功者也乃臣
以二月初三日誓師十二日進兵而該省以初四日勦苗
矣又分兵矣又無何而告敗矣此其於征播得無相妨否
夫臣所督者三省軍務也漢土官兵例得管轄大小軍機

例得與聞敕諭昭然節經申飭奈之何各院道俱有詳而獨無一字詳臣也既不詳則宜竟不詳矣又何失事之後而始倉皇詳臣也蓋此事上下相視以苗爲易與謂一舉滅之當以功報而不意其決裂至此始不得不以相聞然晚矣臣請著爲令自今以後二省兵事除尋常強竊盜賊不必瑣瑣相聞外但凡土司郡縣衛所漢夷一切有關兵馬錢糧重大事情應詳者詳應驗者驗卽事在當機難以遠請者亦一面舉事一面報聞庶臣得以參酌贊成或未必毫無裨補臣生平職掌之外不好多事惟是有感於皮林寨之事如黃冲霄之不任專征與衛所軍之不蒞勦苗

知之頗真當征播之時不宜別有舉措以亂大謀籌之頗預使其有一字之間亦未必無一言之助幸而事止於此若更大則此省之進兵有阻當是時而後重加參處已無及矣伏乞敕下兵部通行議覆行臣等遵奉施行其黃冲霄員缺仍亟選智勇將官除補該省苗情俟播平另行議處地方幸甚緣係楚省分兵勦苗失律納侮乞賜究處以肅法紀並議遙制事宜以一軍政事理未敢擅便爲此具本專差承差周之冕齎捧謹題請旨奉聖旨該部知道兵部覆奉聖旨是

保留方面官員疏

題爲保留給由方面官員事據四川按察司呈奉臣批據本司建昌兵糧道副使顧汝學呈稱云云該臣會同巡按四川監察御史崔景榮考得四川按察司建昌兵糧道副使顧汝學清脩有韻恬淡無營遠夷頓爾向風羣吏瞿然顧化稱職茲當三年秩滿例應給由應令赴部考績第本官管轄盡皆夷獠今川省方有征播之役各道兵備官俱宜在任彈壓地方以杜諸夷乘虛窺竊之姦委難離任相應照例題請保留除批該司行令帶俸管事仍造冊差人齎繳外伏乞敕下該部將副使顧汝學覆加考覈題請施

行緣係保留給由方面官員事理未敢擅便爲此具本專
差承差周之冕齋捧謹題請旨奉聖旨吏部知道覆奉聖
旨著各就彼復職

查叅黔路得關復失將官疏

題爲黔路失律喪師得關復失據實查叅以肅軍政事本年三月二十八日准巡撫貴州都御史郭子章咨據左監軍按察使楊寅秋報稱本月十五日戌時據河渡統兵都司張秉忠飛報十四日夜因擒姦細搜出公文已知賊來衝營預令部兵加謹慎防一面請兵應援十五日未時播賊數萬突然而來雲南官兵先殺一陣敗走過河泗城官兵初尙剷住以俟交鋒後慮糧餉積在老寨尤恐有失遂卽收兵同守糧餉并分兵把截渡口發兵應援緣由到司除會同總兵星催鎮雄隴兵策應及督泗城滇兵剷營外

至十九日據統領雲南中軍官張澍報稱十五日賊兵數萬前來滇兵沅江甯州羅平迎敵以象先衝挫其先鋒賊遁走斬馘詎料無援兵象奮不顧身淹溺督陣官何天慶名色把總甘靖方朝宗楊玉王彥緯哨長許應援奮身衝鋒各手砍逆賊數人中槍而死餘各陣亡領兵指揮胡珠王之瑞馬時亨督陣贊畫黃龔千戶龔勳劉應祖百戶邵先業把總周貴安時大冒陣而出賴馬浮江僅以身免收同餘卒同劄守老營卑職撫戢餘兵暫退養銳具報到院除行張澍領兵劄守及再調滇永各兵進剿并行查死傷官兵另報合行移知同日又准該院咨稱三月二十日准

總兵童元鎮手本移稱本月十七日寅時據統督永順哨
原任參將楊顯稟稱十六日午時永順兵出哨至雅水偶
遇安兵彼此約會盟誓共圖攻取各有旗幟目把質當意
在十八日起營本鎮正疑慮間隨准左監軍面會此必賊
詭謀亟傳令諭適據壩陽守備陳雲龍走報探得播賊馬
步兵不計其數前來衝突卽同監軍飛騎臨河親督抵敵
連對三陣至第四陣賊勢益眾所執旗號卽昨會哨質當
旗幟永順中哨驚亂麾令督陣等官拔刀不能禁止壩陽
兵相繼奔渡浮橋當有一人走過砍斷橋纜隊兵俱各浮
水不能水者淹沒守備陳雲龍等亦尙未知下落砍纜之

人當時擒獲審名簡宣經會監軍面審另解該本鎮召集各兵另行相機進剿理合馳報除行童元鎮集兵戰守并添調雲南永順精兵進剿及將解到細作發按察司審明詳報其殺傷官兵候查明至日另覆合行咨報又據總兵童元鎮呈報相同又據按察司楊寅秋揭稱查得烏江河渡雖共一路賊巢鬼囤長箐隔斷六十餘里兩關峻嶺峭壁距河險惡三月十一日攻剋烏江關十二日攻剋河渡關該職會同童總兵計議兩路距播治計程僅七八十里賊必併力一向我兩軍復隔越今鬼囤既掃擒斬幾二百名類急應合哨攻打長箐庶兵勢不分策應爲易就於十

四日移會各哨揭報軍門督行間十五日泗城土官岑紹
勳擒斬楊應龍塘報六名接出說帖領大眾前來衝突把
總葉明遠知風先逃過河本日午時賊擁步騎數萬先衝
雲南兵子營驢象連戰數陣賊俱損傷賊將象奴射倒矢
石交衝象鼻回頭反觸又丟火磚不如法營中火起陣勢
遂亂泗城自保不赴救援賊登高勢便原任謝參將部兵
先走滇泗兵不支各奔回對岸老營因浮橋兵多纜斷土
兵浮水過河不能水者淹死不下千餘陣亡督陣官何天
慶泗城頭目黃勇等八名滇兵頭目生死未知下落十數
名當該泗城統領官都司張秉忠督率泗城土官劄住三

板橋保守渡口滇兵因無土官當各漫散逃回就經傳令
督行坐營張樹收拾回屯劄佐防禦十七日賊乘勢衝突
烏江先日永順兵哨至通木山等地方遇賊數萬冒稱水
西隴澄兵前來會哨歃血盟誓各換旗幟號頭各留頭目
質當十七日辰時又差細作五名手持令箭稱水西王把
事差來陳守備營中會哨陳守備覺將姦細細縛賊已近
營永順兵雖號萬名原無定數又先日哨瞭各兵半未回
營卽時分哨迎敵賊眾我寡又別一枝賊兵從刀靶水包
出所執旗號卽係先日所換旗幟永兵慌亂退奔陳守備
壩陽兵相繼奔投過河及半姦細砍斷橋纜陣亡原任參

將楊顯壩陽守備陳雲龍廣西守備白明遠原任守備阮仕奇湖廣領兵指揮楊應芝把總張一仕賈文忠張翔淹死兵士約七百餘名星飛催調標募營等兵二千餘名拒河固守賊兵退回除收集永順及土漢兵繕治衣械合泗城屯營劄佐激勵共圖再舉理合揭報各等因塘報到臣案照先爲三省征播大勝蜀黔更破險關再報捷音事據總兵童元鎮監軍楊寅秋報稱三月十一日守備陳雲龍督率壩陽兵白明遠阮仕奇督率永順兵奮勇爭先剋破烏江關斬獲賊級一十九顆十二日參將謝崇爵坐營中軍張澍督陣贊畫黃龔發兵奪占河渡關生擒播賊二名

斬首十五顆又張樹督象渡關生擒三名斬首十顆各等
因隨會同湖貴二省撫臣支可大郭子章具本於本月二
十一日題報訖今准前因該臣會同貴州撫臣郭子章看
得王道出於萬全王師貴乎持重彼逆首雖狂狡乎其地
直彈丸耳今且集各省之兵環聚而圖之此以八服一蓋
十全必克之道也惟是相機而進待時而發以彼之無所
不守當我之無所不攻雖有勇智將安所施初臣之誓師
進攻也期以進則齊進攻則齊攻既而各路以遠近不同
及梗道之零賊堅瑕不一自不能如期抵關臣隨爲一單
開數款授之各總兵與監軍內第二款云一賊常言各處

防守幾時是了不如放一枝入關與之併力一戰破其一
路各路自懼今宜到關時劄一大營以爲家然後以輕騎
探望各路俱到關方一齊殺進賊自不能分身應之成擒
必矣各路鎮道守此勿失如南川路破關以初九日龍泉
路破關以十五日各堅守至今會師並入蓋其慎也乃烏
江路以十一破關稱疾足矣據關自守稱得勢矣謂宜深
溝高壘堅壁以俟又須瞻前顧後扼要防姦庶其稱有制
之兵成無敵之烈乎獨奈何玩忽不戒一敗塗地也臣謂
烏江之敗有六失焉初臣計賊兵動號數萬我兵雖分八
路必不能一齊到關若奪關之後據關而守彼或以全力

衝之眾寡不敵不無可慮故臣所派入路兵皆三萬餘此無容更分矣該路兵止宜聚於烏江其河渡則張疑以守可也乃分而爲二相去遼遠我分彼合眾寡懸絕爲賊睥睨久矣其失一也兵旣分矣幸而得關宜合兵以守以待大軍無容更入矣而河渡方且攻圍烏江亦未治壘其失二也關在前江在後是背水陣也法宜死戰而見賊輒走其失三也欲覓退步必須守橋庶幾可前可卻乃無一夫之守姦細得而斷之其失四也換旗合哨非倉卒事旣知有姦卽宜整備而悠悠忽忽遇敵先亂岳家軍殆不如是其失五也土漢錯雜緩急異指一失駕馭豈得調和積妒

成爭自分秦越符離之事殷鑒不遠其失六也此六者兵家所忌也有一於斯足以致敗而皆犯之宜其及矣今各路兵日日報捷且取次入關逼圍逆首授首當必不遠卽少此一路無妨進取獨是張逆賊之氣寒戰士之心劔師耗財損威辱國有足恨者且聞喪失淹沒幾至數千已行嚴查未到其在事將領無所逃罪願陣亡者已過半矣見在惟總兵充爲事官童元鎮都司張秉忠原任參將謝崇爵雲南領兵中軍官張澍四人而已童元鎮身爲主帥才謝丈人東隅之失已多桑榆之收無望會須一處以謝三軍張秉忠謝崇爵張澍各帥一旅以贊四征東伍無能故

士畏敵而不畏將望風輒靡不能致人而致於人坐使全軍幾覆誰之過與難謂三軍大敗不可斬也以上各將俱應重究但張秉忠同事已經陣亡張澍遇敵初猶鏖戰相應姑免以責後效謝崇爵部兵先奔以致大潰則罪無可原者也監軍按察使楊寅秋既有督兵之責難辭失律之愆但士不用命難罪文臣且向來之拮据多勞更末路之圖回可望所應量行議處仍俟通論者也除亡失的數與夫先奔將士仍候查明另行外緣失事頗大合先奏報伏乞敕下兵部議覆請旨將童元鎮革任原缺另行推補仍與謝崇爵行巡按御史將兩處失事情節查勘明白定罪

具奏楊寅秋量行罰懲俟事完通論庶法紀以明軍威可
振矣若臣化龍調度無方損失有迹無所逃罪惟聽聖主
處分而已緣係黔路失律喪師得關復失據實查叅以肅
軍政事理未敢擅便爲此具本專差承差張思忠齋捧謹
題請旨兵部覆奉聖旨童元鎮失律喪師法所不貸著
督撫選差的當官扭解來京審實究罪謝崇爵臨陣先逃
卽以賜劔處斬張秉忠張樹姑准戴罪殺賊責立後功仍
嚴行申飭大小將領俱要奮身力戰毋蹈覆轍取罪不饒
安疆臣著遵前旨宣諭及劉綎等各將聯絡並進併心滅
賊毋得有分彼此驕妒觀望以致大軍久頓不解成功賞

格俱在有違國法凜然決無少假李應祥著充總兵官換
制敕與他餘俱依擬

請停接括疏

題爲軍需正急庫藏已空懇乞聖恩亟賜停免接括以佐
征討以靖禍亂事據四川布政使司呈奉臣案驗准戶部
咨爲奉旨清查歲額積餘等銀是否通行伏乞欽敕以便
遵承以肅法守事該本司左布政使盛世承看得云云由
詳到臣案照先准戶部咨該督徵四川稅務御馬監太監
邱乘雲題前事奉聖旨前有旨清查各省歲額會銀及餘
積無礙銀兩爾便會同蜀省撫按等官遵奉前旨從公查
勘具奏敕諭不必又請如有官吏人等抗違玩視的准爾
據實指名叅來治罪該部院知道欽此欽遵移咨到臣案

行該司查議去後今據前因該臣會同巡按四川監察御史崔景榮看得川省錢糧坐派有定額出納有定規然遞年正支之外稍有餘賸故先年每遇別省軍興常得借用乃年來採木事起費用浩繁於是庫藏一空所存無幾矣採木之事未停征播之事復起當是時臣行布政司查見在庫銀僅餘百萬除年例正支外其爲節年積餘堪動者不及六七十萬臣竊危之因請大發內帑而未得也止太僕寺解到七萬然已借貴州十萬矣請得停止解陝銀先已解去矣請得償還借滇銀而滇銀已轉還貴州矣則川省蓋毫無假借於外方也夫與師十萬日費千金今川省

用兵不止十萬加以買馬製器轉運犒賞事事創爲繁費不貲蓋至今日而司庫之積蕩然一空也豈惟司庫卽各州縣當賊破綦江時遠近惶駭各圖戰守修城鑿池招兵買馬於時急在然眉多先動支而後申詳臣近因司銀不繼行各州縣以庫銀堪充軍餉者解發軍前充餉而各州縣所報有六七十兩者有二三百兩者千金之貯不數十見由是觀之此外又安有餘銀安有無礙者哉今兵已入關矣賊且上國矣然其險不易攻攻不易剋環而守之未卜何日方了賊一日不平兵一日不撤兵一日不撤費一日不止卽賊平而功級之費散兵之費犒賞之費善後之

費賑恤之費百孔千瘡難以億計尙不知出之何處今內帑動稱匱乏已必不敢望頒發外省各經接括已必不得假借臣方處難下之勢當維谷之時罷之則一死豈足塞責圖之則空拳何以搏虎每每當寢而起坐當食而輟箸髮一夜而半白年未衰而先老百感交叢不自知其稅駕之所也今聖旨已下中使有行儻遂遍厯州縣盡數接括以軍需盡爲無礙以外府盡入內供則本折兩無士馬奚賴枵腹之眾脫巾而呼經年調發一朝潰散垂亡之逆賊卷土而來伺隙之羣姦唾手而起當是時臣固已身無處所矣陛下之四川可再得乎是一舉而以西南半壁之天

下爲戲也夫年來用兵甯夏朝鮮並此而三矣甯夏發內帑六百餘萬朝鮮發內帑一千餘萬今川省未有數十萬之發也乃並其地方之積餘一掃而歸之內帑豈往日之兵馬皆須動給錢糧而今日之兵馬可以任其生死乎豈邊地應急外國應存而梁益黔楚數百萬之生靈數千里之封疆可置之度外乎此臣之所最不解者也嗟夫川民亦可憐矣採木者陟岡歷澗已死復生運餉者冒瘴衝炎旣生復死當賊者身首橫分室廬爲沼不當賊者租庸十倍雞犬不甯川有司益又可憐矣自採木事起而經年在山自征播事起而經年在播勤能者一身而百委交叢遲

鈍者一誤而一官不保今幸賊勢漸衰完局可望小民冀有旦夕之安有司希得息肩之日陛下縱不能大發金錢早俾竣役又奈何扼其背絕其吭收其供軍之資貽以不了之禍令遠近士民嚮然喪其求生之心欲籲天而無從也臣爲此懼不敢不以上請伏乞敕下內監止司稅務暫免撥括爲三軍留數日口食爲三巴留一線生路則地方幸甚臣幸甚臣無任哀懇仰望之至緣係軍需正急庫藏已空懇乞聖恩亟賜停免撥括以佐征討以靖禍亂事理未敢擅便爲此具本專差承差郭榮祖齋捧謹題請旨

贈錄戰將王芬等疏

題爲逆賊糾眾爭關棊路先敗後勝據實報聞乞賜特旌
死事將領以勵臣節以作士氣事本年四月初九日據棊
江路督餉紀功參政張文燿報准原任南京右軍都督府
署都督僉書今充爲事官劉縝手本報稱本職於本月初
一日分布官兵於地名白石口劄營候各路兵馬約齊進
剿閏初三日辰時忽據哨役飛報逆賊楊應龍領兵數萬
沿山逼嶺蜂擁而來本職卽率各營兵馬分頭迎敵自辰
至午賊兵愈添我兵奮勇血戰連闕數十陣銃礮弓弩齊
發賊兵稍卻都司王芬守備陳大綱土官楊愈皆奮不顧

身乘勝追至青龍關被流矢所斃本職親率中軍王九思家丁千把總劉可春劉招孫等併力追勦衝過青龍關鏖戰十數合賊眾大敗奔潰時已天暮焚其關寨收兵回營又該遊擊周敦吉守備周以德等相繼直追至養馬城方同三路官兵斬獲功級三百三十六顆被傷及墜崖死者甚多奪獲戰馬七匹盔甲器械三百九十六件陣亡跌傷被傷官兵冊送紀功官查覈轉報惟是審據生擒苗賊吐稱楊應龍因見本路官兵入關隨同逆子楊朝棟楊惟棟并親族楊珠等統領傾司上刻老虎兵并各種苗夷分爲三路應龍與二子各統三萬并諭各苗自稱我等生死只

在今日必要決一死戰又令楊珠等統兵抄往後山奪占
婁山關要將官兵四圍包住奮力敵殺使不能出不期天
兵嚴防等語爲照狡酋以傾巢之寇併力本路自謂阻據
婁山斷我歸路必使三軍無一生還若非仰仗天威將士
用命殺敗賊眾則我前後左右皆爲勅敵圍困其中誠莫
知所終者又據監紀同知史朝貞揭報相同及稱初三日
之戰天全招討司土官楊愈敘南衛百戶聶儒督陣旗牌
官郝大仁皆死於陣至於散兵之亡者以數百計緣眾寡
主客不敵率先敗而後勝不足爲慮各等因塘報到臣除
將陣亡官兵分別收殮及酌量優恤仍候委官查明至日

另行具奏外該臣看得賊負夜郎以自雄東撫長江之流
西據羣山之阻則婁山關固其前門所欲以死生爭之者
也劉綎一旦而入婁山其能甘心坐待不與一角乎綎以
二十九日入關賊以初三日始來其嘯黨呼羣專精厲氣
欲一戰而得志焉居可知矣王芬自入關以前累戰皆捷
意頗自得視賊如無嘗請居前鋒以當賊當日與陳大綱
楊愈立營獨當松門堦之衝去大營遠在數里賊質明而
攻之遂以一子營而當其全鋒眾寡不敵因至衝潰所部
兵且戰且卻多鳥獸散而芬等以各係將領挺身立關遂
爲流矢所中死焉比綎聞而提兵赴之鏡皎齊發賊勢頓

靡又以周敦吉周以德分左右翼而出其後賊遂大奔追之數里斬級三百同知史朝貞所謂先敗而後勝蓋實錄也川兵自開刀以來轉戰數百里未嘗少挫乃茲潰一子營殞二守備一土官且損官兵數百不可不謂失利王芬等之營去大營數里奈何以孤軍受敵不可不謂失算賊來宜有偵戰宜有報援桴而趨之宜捷於影響奈何前軍已敗而後赴之不可不謂失援綖固自負知兵者乃有此失乎所幸一戰破敵追亡逐奔殺傷大當斬馘數多蓋自是戰以後賊遂不敢復向婁山則亦足以褫其魄而奪之氣者且綖自打三洞戰九盤關外之功甚著今且奪關逼

固壓海龍之門而壘論當日則勝足補敗通前後則敗少勝多且今功在垂成宜觀其後卽有損失似應免究獨王芬陳大綱諸人力戰有功委命疆場所宜亟加卹典以勵羣心者爲照保定坐營加銜都司王芬負膽似斗有髯如戟高散金養士之風厲撫劔酬恩之志不辭馬革誓掃狼煙東征加銜守備陳大綱久在戎行夙稱健將頻年東討方掛扶桑之弓此日西征竟作睢陽之厲此二臣者所宜特加贈官仍與世廕更爲立廟婁山關以旌其忠者也天全招討司副招討楊愈原出太原之裔居然世將之風萬人獨往真熊熊不二心之臣九死不移愧夷獠持兩端之

輩此一臣者所宜超加贈官仍徑令其子楊時和承襲以
示優異並附祀於婁山之廟以爲土司死國之勸者也其
百戶督陣等官則候事完勘明類報優卹緣茲事有關激
勸合行具題伏乞敕下兵部議覆將劉挺侯事完通諭王
芬等先行褒異庶忠烈之英靈不散將戴德於九原營伍
之感激無窮可收功於百戰矣緣係逆賊糾眾爭關官軍
先敗後勝據實報聞乞賜特旌死事將領以勵臣節以作
士氣事理未敢擅便爲此具本專差承差郭榮祖齎捧謹
題請旨奉聖旨兵部知道本部覆奉聖旨各官忠勇死職
卹錄宜優王芬贈都督僉事廕一子與做副千戶世襲陳

大綱贈署都督僉事廕一子實授百戶世襲楊愈贈宣慰
司副使楊時和先准承襲父職餘俱依擬

辭陞疏

奏爲天恩隆重揣分非堪懇乞聖主辭免新命以安愚分
事萬曆二十八年四月二十八日准吏部咨爲給由事該
臣奏爲前事該部覆奉聖旨李化龍著陞都察院右都御
史照舊總督欽此欽遵備咨到臣竊念臣本書生無他志
略向偶承乏遼邊淹及三載無所短長自知不任兼之病
廢因乞身而歸無何復蒙聖恩起之田間授以兵寄存及
一載更少建明卽今督兵入播與賊相持尙未知事之所
底由前則守邊無功由後則攘夷未效臣之曠官溺職已
可見於前事矣三年考績幸免幽黜已屬望外更加以不

次之擢不已過乎夫右都御史二品之崇階而總憲之重任也位尊則非薄德所宜居體大則非小器所能任臣卽厚顏而承之將使遐方裔土逃聽遠覽之人且謂海內卽乏材奈何以猥瑣無似之流畀以總持風紀之寄不亦輕朝廷取遠人之侮乎夫因事而授官人主之所以明法量能而受事人臣之所以明義如以爲臣在行間用以彈壓將吏則原銜以兵貳兼憲職不啻足矣如以爲計資而程勞則資誠及之勞於何有甚非臣之所宜蒙也是用引分揣已控訴具辭伏乞陛下收回成命容臣仍以舊銜總督庶不至踰分以濫恩亦可安心以圖報矣緣係天恩隆重

揣分非堪懇乞聖明辭免新命以安愚分事理未敢擅便
爲此具本專差承差齋捧謹具奏聞伏候敕旨奉聖旨考
績加恩已有成命不隹辭吏部知道

糾叅庸狡文武官疏

題爲滅賊在卽庸將爲崇據實糾叅並議處庸狡府官以
明節制以靖妖氛事臣惟播賊大逆無道自干天誅陛下
不以臣爲不肖令會師進剿臣初受命如芒在背計惟數
萬惡苗信信思逞三省物力落落難合利鈍之數甯復可
知乃今進兵三月矣幸而以天之道陛下之威靈八路同
攻三軍用命蕩其土宇焚其廬舍殲其兇黨宥其降人彼
逆酋者失千里之封疆棲窮絕之孤國我軍四圍而環攻
之如鼠在穴如魚在沼薰之灌之網之烹之惟其所爲更
無他慮臣日惟嚴併諸路竭力饋運期無乏絕所冀旦夕

一鼓蕩平擒斬元兇俘馘羣醜臣惟有直登海龍顛燕勞將士耳乃何意事且垂成功在漏刻突而有總兵吳廣者喪心病狂怯戰講降坐延時日而老師費財也臣請先言其怯戰講降之實而後及其他初賊見我兵入關知兵力難敵則每路各遞投降公文三五封劉綎則鎖其使於營中吳廣則厚犒其使與之期日而遣之臣恐諸將爲所紿乃移文營中謂賊黨之降可受賊父子決無降理降必有詐不可不防自後賊使來當斬其使焚其書第急攻之當無不下又恐劉綎或以有舊與之通也則直數之曰爾何故納其使於營受其降文欲通賊耶吾且以尙方取而首

經得檄大哭指天自明械其人於臣軍門臣謂經不通賊
廣無慮也乃賊知經已不可通獨廣可愚因專力通廣廣
遂欲乘此獨受其降以專功而微利則日與約降更不言
攻國事四月二十五日賊以楊永用至廣營約降時方接
臣檄不得已斬永用而攻之奪其關互有殺傷賊見事急
復以楊文舉來約田氏降廣密受之至二十九日眾方約
攻廣曰無庸也各營且來受降於是臣所遣督攻按察使
張悌監軍參政張棟總兵劉經馬孔英皆至至則國上人
曰田氏來降久之但見一婦人於國上三十六步之下拜
表痛哭而已且令諸文武至彼受降廣卽欲赴之監軍張

棟曰彼無一介之使入營大將可輕身往耶張悌亦力止之始不行因令人取其表觀之皆支詞蔓語歸罪於人非實降也棟等因批令田氏擒斬應龍者當如賞格而廣遂爲判定限三日至三日而杳無降音也眾復議攻時久雨計天晴卽合攻矣乃初五日而楊朝棟又詐爲應龍仰藥死申報廣廣又信之卽差人往驗屍賊以假屍令驗歸報廣益信之復約諸文武驗屍時諸文武以臣督攻急但約攻至初七日天稍晴眾往攻會雨作復止廣獨按兵不動既有自國上奔來者云田氏非降欲以緩攻屍乃楊珠前一日川兵攻圍火礮所斃者賊欲借之而以詐死埋名完

局也自是一軍皆笑廣所爲而會臣與按臣所切責通賊之檄如雨所督攻圍之人項背相望諸將益治攻具至初十日天稍霽急攻之始燒二關奪三山賊依舊集諸苗死拒而投降仰藥之事盡付之無何有之鄉矣嗟夫廣年已六十老在軍中詐降詐死狡酋事急計且爲之豈以廣而有所不知則以怯戰之心奪之耳初臣見諸將久不入關因與約曰至三月之終而不入關者斬其部將大將以巾幗辱之時湖貴二將以烏江新敗軍心頗搖不能卽入關四川三將馬孔英已據關久矣劉綎得檄疾馳以二十九日入關廣聞之始以初一日發兵打崖門至初三日乃身

自入關至則營水牛塘賊與戰三日力卻之然自是有懼心矣其投揭與臣謂諸將未至而獨令彼入爲臣愚之臣讀之曰廣畏賊若此得無悔其入耶蓋自是乃絕口不敢議攻也且廣之孟浪風狂殆不止此初臣分布二監軍張棟監川東路謝詔監川南路初入關時詔尙以病留關外棟先至移文三將分布夾攻廣手其檄抵之於地曰爾川東監軍何得管我事我川南無監軍耶不用其約夫攻賊自本等事監軍有約卽宜投袂赴之何問川東川南而惡語相侵何無禮也自爲約約三將以十七日攻至十六日而背之又止告綦江路不告南川路致令發兵以孤軍被

殺者六十人又不發兵救之次日聞綦江發兵乃發纜出門輒止曰吾保本路無失足矣比聞二路奪養馬城破海門關又與監紀知府蔡宗憲飛使報功攘爲已有爭之不已查之再四而後明何其狡也臣恐諸將不齊心令按察使張悌於國下約會文武歃血同盟以五月初三日期集神祠廣獨不至三請始來來則曰應龍欲限十日來降眾折其非則曰事不成我不過回家守我指揮二道謂公爲大將事不成何得歸則曰我在行伍多年親見某時某事某總兵去某總兵來何得不歸嗟嗟大兵討賊海內震動夫糧糴騷雞犬不甯臣拮据督併寢食久廢卽稍有人心

者恨不滅此朝食廣身爲大將獨欲敗其事歸守指揮朝
廷養士固若是耶何其悖也臣計破圍之後諸軍必爭國
上財物儻爲賊所餌勝返爲敗卽賊已盡而我軍以爭財
相殺買禍更費收拾數數行之軍中令破圍之後封府庫
禁搶劫又爲手書遍告道鎮令其公同檢視將賊之財物
封識看守造冊呈詳聽候批發奏報給賞不得縱兵恣掠
致取嫌疑廣得之拂然曰此事必不能從但取成功足矣
身爲大帥不思止亂先爲釀亂之詞豈其有所垂涎於中
耶何無恥也每對人言吾無心做總兵今至此地位歸亦
足矣又言吾爲四川正總兵賊應屬我擒誰敢爭我卽與

爲事官戴罪殺賊立功自贖

糾劾有司疏

題爲糾劾不職有司以飭吏治事照得蜀地僻在西南民俗黠吏治偷惰所從來矣臣於受事之初業以遵奉聖旨會同前任按臣趙標將全蜀有司斥逐更調共三十餘人一時吏治少覺清肅迄今播事方殷大計非遠有司苟無大過未嘗不鞭策使之乃若叢利於己結怨於民或廢弛已極叢勝已甚一日不可居民上者若不一摘去之而直待大計遐陬之民奚罪焉臣謹會同巡按四川監察御史崔景榮爲皇上陳之訪得犍爲縣知縣劉唯一以財爲命有蠅營狗苟之心視民爲警行如狼牧羊之政指採木

侵扣山本八十兩復以累民因運木加派夫價二百金盡
以入已征播發銀糴買此不得已之役也穀每石扣銀五
分豆每石扣銀一錢是亦不可以已乎受詞問理罰贖亦
有司之常也每月既放告三次每日又准狀數張得無取
贖太多乎各行之貨物各役之工食孰非民脂而半攫之
囊中是可爲孰不可爲楊倫等五人張月照等數人原非
眞盜而盡斃之杖下是可忍孰不可忍彼孳孳而爲利若
惟日不足民喑喑而胥讒曰時日害喪此一臣者所宜照
貪酷例革職爲民者也平武縣知縣陳尙賢身入晚景自
覺來日無多時遊醉鄉每日人生能幾借富民以償京債

已非法矣又挨行而給食公平乎私乎改工食以充軍餉已在庫矣復出借以收息官耶吏耶詞訟有告卽准顧能准而不能問也徒令差人之腹果然工食盡收在官顧肯收而不肯散也求免胥徒之口難矣市物已用官價又每給以半值飭怒每用非刑或至撻之終夜其事之積如山其門之沸如市其民知有吏不知有官其官知有己不知有民但其任未及期年其守未至大害此一臣者所當照才力不及例降調閑散以責後效者也伏乞敕下吏部再加查訪如果臣言不謬將劉唯一革職爲民陳尙賢降調閑散另選精明廉慎者代之庶吏治得人民生有賴矣緣係

糾劾不職有司以飭吏治事理未敢擅便爲此具本專差
承差陳治道齋捧謹題請旨奉聖旨吏部知道本部覆奉
聖旨劉唯一著革職爲民陳尙賢依擬降調閒散